

AWE Mainta

Februari 5, 2018

www.awemainta.com

www.facebook.com/awemainta

noticia@awemainta.com

583-1400

GRANDIOSO FIN DI SIMAN CARNAVALESICO



Experience the difference

- Alarm Installation
- Camera Installation
- Online viewing
- Monitoring Service
- Guard Service
- Patrol Service



Your protection
partner since 1996

We don't just say it...
We Guarantee it!



**INVEST
SECURE N.V.**

Phone: (297) 582-7252
E-mail: insec@setarnet.aw
f: [@investsecurearuba](https://www.facebook.com/investsecurearuba)

= exact

Business Processes
Marketing, Sales and Service
Logistics & Supply Chain Management
Reporting & Compliance
Planning & Production
Finance & Accounting
Project Management

Supporting all
your business activities

Our goal is to understand and anticipate your business requirements. It means that everything we do is geared towards equipping you with solutions that will help you succeed as markets evolve

VCC
International NV

Solutions for Finance, Manufacturing,
Wholesale Distribution, Professional
Services, HRM, CRM and BPM

Exact. And it all comes together. Tel: 583-7072 | info@vcc.int.com | www.vcc-int.com

Caso asesinato Jaburibari posponi te 18 di mei

TANTO e acusado Teddy G. como su Abogado mr. Faarup no tabata nada contento cu un biaha mas e caso di asesinato na Jaburibari a wordo posponi y te pa 18 di mei. Apesar cu esaki ta pa motibo cu ainda Hues Comisario no a logra haya e testigonan cu defensa a pidi pa wordo interroga riba diferente punto. Debi na esey mes, e Abogado a bisa, cu e ta pidi pa su cliente wordo laga temporalmente den libertad, entregando su paspoort. E peticion aki ta bin debi cu nan ta haya cu e investigacion den e caso aki ta laga hopi di deseo y cu e pruebanan cu tin te aworaki ta mas na favor di su cliente, cu e no tin di haber. Tin persona cu tin mas motibo pa mata e homber Asiatico Thuy Hoang Nguyen Quach. Den e investigacion aki tin masha duda. E abogado a bisa Hues cu e ta haya cu for di e raport tin asina hopi duda cu e ta haya cu no por mostra cu su cliente ta e sospechoso den e caso di asesinato. Tur e otro hendenan cu tabata den e apartamento, Fiscal a manda cas y Teddy so a keda deteni. Ta pesey ta hopi importante pa Hues Comisario interroga e testigonan pidi via camera y esaki no a tuma luga ainda.

E Abogado a splica cu di e relato forensico ricibi, e homber Evans, kende ta esun cu a huy di e luga y a core bay aeropuerto cumpra pasashi, tin mas “schotresten” riba su man cu e acusado aki. Ademá, Evans tabatin un discusion fuerte cu e victima un dos minuut prome cu e hecho a tuma luga. Pues e Abogado ta haya cu e homber aki tin mas motibo pa mata e homber Asiatico cu su cliente.

Tin hopi cos strañ, manera e hecho cu el a core bay cumpra pasashi pa e



bay y despues ta declara, ora cu el a wordo deteni, cu nan a wordo atraca. E Abogado ta sinti cu a laga e otro personanan den e investigacion demasiado lihe den libertad. Ademá, e arma di candela, a wordo haya algun dia despues den e apartamento di Evans. E acusado mes a haci uzo di su derecho pa keda keto. Pero diabierna den Corte el a papia y a haci un apelacion na Hues pa laga scucha e testigonan pasobra tin hopi cos straño a tuma luga y tin hopi pregunta sin contesta den e investigacion aki. Si scucha e testigonan aki, “por sali na cla cu mi ta inocente sra. Huez,” e acusado a bisa. El a splica cu di e comunidad cu e ta bin ta custumber cu nan no ta papia y ta keda keto pa evita represalia.

Ta wordo bisa cu e anochi ey tabatin un fiesta den e apartamento na Jaburibari. Despues di e sucedido diferente di e personanan cu tabata na e sitio a huy den un auto di huur y ora

cu nan tabata wordo persigui door di Polis, nan a tira placa for di auto. Por ehempel den e investigacion no ta para pakico e hendenan a haci e cos aki.

Hecho ta cu Ministerio Publico ta pensa cu lo tuma un tempo atrobe pa por haya autorisacion y cooperacion di autoridadnan Mericano pa interroga e cuatro testigonan, pa cual a pone e fecha di 18 di mei pa sigui cu tratamiento di e caso.

E Abogado despues di a trece su argumentonan mustrandó duda den e investigacion te awor, a haci un fuerte apelacion pa su cliente wordo laga den libertad.

Hues a bisa cu e tratamiento lo sigui dia 18 di mei y despues lo informa e Abogado ki decision el a tuma riba su peticion pa laga su cliente den libertad.

Esaki tabata di 4 biaha cu e caso di Jaburibari ta bini dilanti den Corte y ta wordo posponi.

Eventonan di fin di siman a percura pa pelea y hopi detencion di cual hopi ta hoben



DEN e fin di siman tras di lomba tabata varios actividad carnavalesco cumisando diabierna anochi ci Hebbe, sigui pa Jouvert Morning, Lighting Parade y Parada di mucha ayera. Polis a haya nan mes ta atende pelea y varios detención pa personanan cu tabata haci fastioso.

Remarcabel tabata cu den e detencionnan tabatin hopi persona hoben cu tabata abusa di uzo di alcohol.

Diabierna pa mas of menos 1'or di marduga, polis tabata para banda panort di e parkinglot di postkantoor, den cuadro di e evento carnavalesco di Hebbe Hebbe. Mas of menos 50 meter dilanti di e agentenan a surgi un pelea entre mas of menos 10 pa 15 hoben. Mirando esaki, polis a dreña aden pa asina habri e pelea for di otro. Na yegada di polis, a mira e conoci di polis y husticia yama SS, ta dal un hoben cu mokete na su cara. Tambe nan a tuma nota di e otro conoci di polis y husticia DiDi, bisti cu un tshirt shinishi, cu tabata forma

parti di e pelea. Ora cu S. a mira polis, el a core bay direccion zuid door di e publico. Polis a core su tras bay zuid door di e publico. Despues di un sprint di mas of menos 20 pa 30 meter, polis a mira S. ta cay abao hunto cu un otro hoben. Polis a reconoce e otro hoben, cual tabata DiDi, kende ta forma parti di e gang di Village. E ta un persona color scur, cu dreadlocks y tabata tin un shirt shinishi. Mirando cu e descripcion ta cuadra cu loke nan tin di dje, polis a saca afo for di su punto di bista, cu ambos a lucha cu otro. Personal di CEA a bula riba S. y a logra pone na boei. Polis a bay riba e otro homber, y ordene pa drumi plat abao riba su barica. Pero e no a haci caso y a resisti for di su posicion na suela, y tabata tira scop y mokete den direccion di e agente. Polis a coy su kinsena y a propin'e cu algun tik pa kibra su resistencia. A dun'e algun sla na su pia parti ariba y su brasa. Door di su movecion bruto cu su pia y mannan, e punta di e klop

a alcanza su cara, di manera cu esaki a haya un kap. Despues di esaki e resistencia a wordo kibra y a logra pa finalmente pone na boei.

E siguiente evento tabata Jouvert Morning unda cu Polisnan cu a controla trafico a detene 6 chauffeur manehando bou di influencia y di dos di nan a kita nan rijbewijs. Pa loke ta e evento mes, por bisa cu e teamnan special a detene 23 persona compara cu e 20-nan di aña pasa.

Diasabra anochi tabatin Lighting Parade unda cu a detene 17 persona compara cu e 5 detencionnan cu tabatin den 2017. Loke cu a hala atencion e anochi aki tabata cu e persona di mas edad cu a wordo deteni tabatin 46 aña y esnan di mas hoben tabata tres mucha homber di 15 aña. Di e total di 17 detencion cu tabatin, 11 di nan tabata personanan bou di 20 aña. Un indicacion cu hopi hoben ta consumiendo alcohol.

[Foto cortesía: Korps Politie Aruba]

Den caso asesinato Mitch Henriquez:

Gobierno ta paga un fortuna pa defendé Polisnan asesino

DEN HAAG - Den seno di e canal di television RTL Nieuws na Hulanda nan no ta mucho satisfecho cu e hecho cu Ministerio di Husticia y Hefe di Cuerpo Policial no kier revelá cuanto placa Gobierno Hulandes ta paga un bufete di abogado masha renombrá pa defendé e dos Polisnan cu a mata e Arubiano Mitch Henriquez. Ta trata di un bufete di abogado masha exclusivo cu pa un caso civil simpel mes ta cobra 144.000 euro y esey a pone cu e canal di television a haci un peticion formal pa nan haña sa ta cuanto Gobiernu ta paga e bufete di abogado.

For di año pasá e canal di television a haci un peticion oficial y formal pa haña sa cuanto placa Ministerio di Husticia ta pagando e bufete pa defensa di e dos Polisnan kendenan a keda condená na 6 luna di prizon condicional, pero cu ta cobrando nan salario normalmente te dia e caso caba den apelacion.

Dia e canal a haci e peticion n'e Alto Mando di Cuerpo Policial na Hulanda, esaki a nenga di proporcioná e informacion riba cual e canal a bay Corte, pasobra nan tin derecho di demandá e Ministerio pa haña e informacion.

Te ainda e tribunal no a dicta sentencia riba e peticion, pero for di promé instancia e tribunal a dicta cu Alto Mando Policial a rechasá e peticion (Wob-verzoek) sin suficiente motivacion.

E tribunal di Midden-Nederland a dicidi esey for di 24 di october año pasá y a duna Alto Mando 4 siman pa coregi nan decision.

Ta di conocimiento amplio cu Mitch



Henriquez a muri na año 2015 na Den Haag despues cu dos Polis kendenan a aresté a choké mata.

November nan caso a bay dilanti y Hues a condená nan na 6 luna condicional.

Originalmente a tarda masha tanto p'e canal a haña contesta (negativo) di Alto Mando Policial riba nan peticion pa haña sa cuanto nan a paga pa contratá abogado y testigo.

Abogado di e canal a splica den Corte cu no ta bay pa nan revelá cuanto e abogadonan ta cobra pa ora ni pa nan datonan personal cu nan por usa pa duna e caso un otro buelta.

Solamente nan kier sa cuanto Gobiernu a paga e bufete di abogado na tur. Alto Mando Polisial a nenga di duna e informacion, pasobra e caso tabata masha hopi den publicidad cu tur e consecuencia y pena p'e famianan cu a keda atras, pero cu e caso a afectá e Polisnan mes tambe.

Segun Alto Mando na Den Haag, pa revelá e gastonan promé cu e caso terminá definitivamente por causa un debate den comunidad riba altura

di e gastonan y si esey ta hustificá.

Alto Mando Polisial tin miedo cu publico lo haña un opinion negativo p'e strategia di defensa di e Polisnan y cu esaki por afectá nan mentalmente.

E tribunal sinembargo a rechasá argumento di Alto Mando Policial categoricamente y a bisa cu pasobra ta trata di un caso cu a haña hopi publicidad, no ta motibu pa nenga di duna informacion riba e gastonan di abogado.

Alto Mando Polisial mester bisa cu argumento valido pakico si revelá e suma total di defensa lo perhudicá e Polisnan inhumamente.

Di un banda Hues ta comprondé cu e Polisnan no kier mas publicidad negativo riba e caso, pero di otro banda interes general ta pisa mas tanto cu nan interes personal.

Ademas e decision di Alto Mando Policial ta violá leynan cu ta goberná e materia, pero e mesun ley ta habri posibilidad pa Alto Mando rectifican nan posicion.

Nan a haña 4 siman pa haci esey.

Hoben di 19 aña condena na 8 aña pa tiramento na Pos Chiquito y San Nicolas

E hoben Edmar L di 19 aña a sinta keto scucha kico Hues a dicidi den su caso, cu tabata contene acusacionnan di intento di asesinato. Na final, despues di a scucha e castigo, el a lanta bay sin bisa si e ta apela e decision of no.

Corte a haya cu a keda legalmente proba intento di asesinato y menasa di morto den e prome caso. Den e di dos caso tambe a keda proba intento di asesinato y posesion di un arma di candela. Loke si no a keda proba ta intento di asesinato premedita, di cual el a declar'e liber.

Hues encarga cu e caso a splica cu el a tene cuenta cu algun punto na momento di impone e castigo. Asina por ehempel a señala cu e victima a wordo tira den pia y despues di esey, e acusado a tira riba un cas, unda cu e habitantenan tabata presente. E acusado tabatin suerte cu

ningun hende a wordo herida, y esaki no tabata debi na dje. Y e no a keda na un intento di asesinato.

Hues a mostra cu tur e casonan aki di violencia ta trece cu e pueblo ta sinti nan mes insegur, mas ainda e tiramento a tuma lug a unda cu tabatin mas hende presente, kendenan a spanta masha hopi mes. Adem as, esaki lo laga e victima cu un trauma. No ta prome biaha cu e acusado hoben aki ta wordo condena pa e mesun tipo di delito. Di otro banda, tambe a tene cuenta cu e edad relativamente jong di e acusado y el a expresa su arrepentimento durante tratamiento di e caso. Tanto e auto como e celularnan confisca, ta wordo debolbi, y el a ricibi un castigo di 8 aña incondicional, kitando e tempo cu el a pasa cera caba. Esaki ta 4 aña menos di loke e representante di Ministerio Publico a demanda.

Loke cu a perhudica e hoben aki ta cu e tabata forma parti di un gang cu tabatin problema cu un otro gang. Den e caso aki el a wordo haya cu un arma di candela, y apesar cu el a bisa cu e arma no ta di dje, tin testigonan cu a mire cu esaki y ta e arma cu a wordo uza den e caso aki.

E hecho aki a tuma Chiquito, siendo cu lug a na final di juni el a sali liber den di aña pasa, na San luna di april. Nicolas y P o s



24
7.4oz. (22cl)
Caribbean Beer
Proudly brewed in Aruba

Chill

cumpra 5 Caha + 3 GRATIS = 8 Caha

e LOOK NOBO di Chill
Cumpra 5 caha di Chill y
haya 3 caha adicional GRATIS!

Disponibel na tur supermarket
Oferta valido pa tempo limita. Pa mas informacion yama: 585-8700

18+ Drink in moderation

Prome Minister Evelyn Wever-Croes:

“CAFT tin confiansa den e vision financiero di Gabinete Wever Croes”

DIABIerna Gobierno di Aruba a reuni cu Colegio di Supervision Financiero, CAFT. Prensente den e reunion aki tawata e Presidente di e comision, sr. Raymond Gradus, sra. Sybilla M Dekker, sr. Robert Croes, secretario sr. Manus Twisk, Sandrien de Klerk y Geert Jansen. Durante e reunion CAFT un biaha mas ta confirma cu e estado financiero cu Gobierno di AVP a laga Aruba aden ta desastroso y hopi difisil. Prome Minister Evelyn Wever-Croes a keda satisfecho cu e reunionnan cu CAFT y a bisa:

“Durante di e reunionnan cu a tuma luga den e ultimo dos dianan, CAFT a confirma cu e estado

financiero cu Gobierno Nobo a haya gobernacion aden tawata desastroso.

CAFT a elabora riba e raportahe di e di tres cuartal di 2017 cu ta casi na e final di Gabinete Mike Eman teniendo cuenta cu nan a sinta un paar di siman despues di e di tres cuartal. For di aki caba por a nota deficitnan gigantesco na unda cu CAFT for di aki caba a duna indicacion cu e normanan segun ley lo no wordo alcansa”.

Prome Minister a duna di conoce cu CAFT ta indica cu nan tin e speransa y confiansa den e vision di e gobernacion nobo y cu Gobierno actual lo trece Aruba bek riba e caminda corecto di e presupuesto balansa.

E mandatario ta bisa



cu e reunionnan tawata hopi elabora riba hopi detayenan financiero. Gobierno a splica CAFT cu ta trahando un trayecto financiero con pa saca Aruba for di e problemanan financiero. Y a enfatisa cu esaki ta un trayecto realistico basa riba cifranan realistico.

“CAFT a keda hopi contento y gradicido pasobra pa hopi tempo nan no tawata ricibi cifranan realistico y esaki nan tawata pone den nan raportnan tambe”, Prome Minister a bisa.

Prome Minister Evelyn Wever-Croes ta duna di conoce cu

esakinan tawata dianan di bon reunionnan cu a termina den bon direccion considerando e hecho cu apesar cu CAFT sa cu e situacion financiero cu AVP a laga Aruba aden ta hopi malo, CAFT tin confiansa den e Gobierno nobo aki y su vision financiero.

BO MESTER DI WASTE BUCKET RESIDENCIAL OF COMERCIAL?

ecotech GROUP

YAMA

Mr. Bucket

594-3757
mrbucket@ecotech.aw

20 yrd Big Bucket

15 yrd Junior Bucket

10 yrd Small Bucket

Peaton alcanza pa auto a haya basta sla



DIASABRA mainta polis ta topa cu un accidente serio na e tubonan di W.E.B na altura di Isla di Oro.

Mey mey caminda un cabayero cu golpi serio na cabes y tawata pa motibo di un golpi serio ricibi despues di wordo alcanza pa un auto.

Ambulance a wordo pidi cu urgencia, mirando e seriedad di e herida. Instancianan concerni a wordo poni na altura, manera Vocero policial señor Lito Lacle cu a duna e siguiente relato:

“09.40 melding a drenta via Centrale Post cu tin un dalmento basta pisa net pabou di Isla Di Oro. Na yegada di patruya ta bin constata cu un auto a dal un peaton. Mesora ambulance a bin na e sitio y a cuminsa brinda e prome ayudo na e victima. Por bisa te aworaki su situacion ta critico y e chauffeur a wordo deteni y hiba warda pa art. 5A. (Coremento bou influencia). Departamento di Trafico y departamento Tecnico di Cuerpo Policial a bay na e sitio.” Con exactamente e accidente a pasa no ta wordo menciona.

E hoben a wordo deteni y transporta cu transportwagen pa warda di Santa Cruz. Segun nos a comprende e hoben a supla y esaki tawata basta halto. Coremento bou influencia ta un problema hopi serio y diasabra mainta un biaha mas el a wordo demostra.

Riba e foto por mira e sla cu e auto a ricibi despues di alcanza e peaton. Esaki ta demostra cu e impacto tabata hopi fuerte. E peaton a haya un golpi grandi na su cabes y tabata sangra profusamente.


B&P/INTERFACE ARUBA N.V.
 Consultancy and Training

How About Those New Year Resolutions ?



We're pleased to announce the training schedule for the months of February through March 2018. We can also provide these training sessions, as customized In-Company training.

- Supervisory Skills Basic (February 14)
- How to Deal with Difficult People (February 15)
- Purchasing & Stock Management (February 17)
- Labor Law In Aruba (March 5)
- Warehouse & Logistics (March 17)

facebook.com/bpinterface

For additional information and registration please contact us!
 Email: bpinterfaceaua@setarnet.aw Tel : 594-5533 / 587-7850



Parlamentario Marlon Sneek

Carta di SADA ta den cashi den oficina di Minister Xiomara Ruiz Maduro

INTEGRIDAD ta cio di gobierno di Evelyne Wever Croes, cosnan ta mal bruha y ta bisto pa henter pueblo cu e gobierno nobo aki no tin nocion di kico ta carga responsabilidad gubernamental.

“Prome Minister den oposicion, semper a insisti c’un mandatario tin cu ‘haci cos bon tambe ora ningun

hende ta mira,’ un expresion politico cu su propio Ministernan a bin ta lubidando por completo.

Na momento c’un Minister di Finansa, den e caso aki Xiomara Ruiz Maduro, informa sindicato SADA cu e no a ricibi ningun carta di e sindicato aki for di ex Minister di Finansa An-

gel Bermudez, esaki ta confirma e mentalidad cu politiconan di MEP a bin ta propaganda for di ocho aña caba.

Pa colmo net patras di lomba di Minister Ruiz Maduro, ex Minister Bermudez a laga cantidad di mapa cu tur documento necesario cu e Minister nobo tabatin mester pa asina e sigui cu continuacion di gobernacion di nos pais. No solamente e documentonan aki tabata den oficina di Minister Ruiz Maduro ora cu el a drenta e oficina, pero ex Minister Bermudez tabata na e oficina pa traspasatur cos pa e Minister di MEP y loke a tuma luga den un forma respetuoso caminda a parti abraso y elogio pa otro.

Fuera cu e proceso a bay ordena den tur sentido, e mandatario por haya copia di tur documento cu e ex Minister a ricibi, y den e caso aki esun di SADA tambe, na BID cu tin tur e documentonan aki registra, pues pa bin bisa cu e no a haya carta riba e asunto aki, no ta berdad.

Ta bin acerca cu ex

Minister Angel Bermudez tabata un ‘vak-minister’ den Gabinet Mike Eman II

y sin duda no tin interes politico algun pa sconde un documento ya cu pa su persona no tin interes politico algun den esaki.

Semper miembronan di partido MEP den oposicion a elogia e trabou di sr Bermudez como Minister y a dune elogio pa e gran trabou cu el a haci den su periodo como Minister di Finansa y awor diripiente net un di esunnan cu mas a elogia e trabou di Bermudez, pa no carga su responsabilidad como e Minister actual di Finansa, ta inventa excuus dilanti di sindicalistanan di SADA.

E tipo di comportacion aki a bira manera un epidemia den e actual gobierno di coalicion, caminda for di Prome Minister Evelyne Wever Croes pa henter e gabinete, e actual Ministernan ainda no por cumpli tur loke nan a priminti pueblo durante di campaña electoral,” Parlamentario Marlon Sneek ta muestra.

10 YARD

15 YARD

20 YARD

CARNAVAL SPECIAL!

WASTE BUCKET SERVICE

FOR DI AWG. 150

Valido di te cu 16 Februari 2018

WASTE BUCKET SPECIAL RESIDENCIAL

Yama awor mes: 582-4684

ecotech aruba

info@ecotech.aw | www.ecotecharuba.com **f** SIGI NOS Ariba FACEBOOK.

Task Force Beach Policy a cumpli cu trabou segun procedura y ley vigente

TASK Force Beach Policy (TFBP) a wordo instala recientemente pa enforসা control riba nos beachnan pa locual ta trata e maneho di Beach Policy.

E maneho cu e TF ta implementa ta uno di '3 strikes' y uno cu ta controla tur operador riba nos beachnan, informa y duna advertencia pa incumplimentonan.

Den casonan extremo y despues di wordo adverti e operador ta core riesgo di perde su permiso pa opera.

consecuentemente nan no por keda n'e sitio ey.

Dia 31 di januari 2018, a tuma nota cu ningun esfuerso a wordo haci di parti di e operador pa haci e sitio limpi y a duna 1 dia (te cu 1 februari) p'e limpieza tuma lugar. Consecuentemente 1 di februari mainta e proceso di limpieza a inicia. E mesun fecha e compania Island Watersport a entama un caso sumario, pa cual al rededor di 3or a ricibi indicacion cu Huez a dicidi pa implementa un 'ordemaatregel', na

unda cu Huez a ordena pa Island Watersport por keda opera pendiente e caso sumario.

Consecuentemente a bay di acuerdo pa pone un tent n'e sitio mientrastanto cu ta warda e veredicto di Huez. Importante ta pa indica cu Huez a menciona cu e 'ordemaatregel' na ningun momento ta reflexion di e resultado di caso sumario.

Mester enfatisa cu e compania tabatin e oportunidad pa actua contra di e carta inicial cu a ricibi dia 21 di januari, sinembargo a warda te ora



cu e TF a constata cu ningun esfuerso a wordo haci y cu e localidad lo wordo haci limpi, pa procede na entama un caso. Operador di Island Watersport tabata

na altura cu e sitio for di unda e ta opera no ta e sitio cu ta stipula den su permiso, y a wordo recorda riba esaki december 2016 prome cu institucion di e TF.

SITUACION

Siman pasa e TF a ehecuta un control riba beach unda cu a bolbe controla operadornan pa locual ta stipula den nan permiso.

Dia 21 di januari TFBP a entrega Island Watersport un advertencia verbal y por escrito informando nan no ta operando n'e sitio indica den nan permiso y cu

LENNOX VRF

inside Lennox® innovation
DUCTLESS MINI-SPLIT SYSTEMS

INVERTER TECHNOLOGY

LENNOX

QUALITY PRODUCTS- QUALITY ADVICES - QUALITY SERVICES

FERTEC NV
AIRCONDITIONING-REFRIGERATION - PARTS

CAYA ERNESTO PETRONIA 45
5882860 - 5633766
FERTECNV_MFER@OUTLOOK.COM

LENNOX

Has anyone ever told you that your air conditioner is beautiful?

75°

72°

* ENERGY EFFICIENCY - UP TO 26 SEER
* SOUND RATING - AS LOW AS 59 DB
* SOLAR POWER CONNECTION
* ENERGY SAVINGS GUARANTEED
* 24/7 AIR CONDITIONING FOR LESS THEN AFL. 250 A MONTH

REDUCE HEATING AND COOLING BILLS BY UP TO 1/2

INVERTER TECHNOLOGY


Dos persona deteni atrapa cometiendo robo den cas na Westpunt

DEN dia dia cla algun persona a bay pa comete kiebro y ladronicia den un cas na Westpunt. Actuacion rapido di Polis a conduci na detencion di dos di e sospechosonan. Diasbra ultimo rond di 3.30 di atardi Polis ta wordo manda na un cas na Westpunt caminda desconocinan a destrui un bentana y a drenta e cas. E persona cu a yama ta un hoben di 18 aña, kende ta scondi den

e cas y tabata scucha e hendenan ta cana den e cas.

Dos patruya a wordo manda cu urgencia na e adres en custion. Na e sitio, e Polisnan a drenta di parti patras di e cas y a mira un homber color cla bisti cu un jeans y t-shirt preto, petchi berde y un rugtas den su man. El a habri e porta y a trata di huy. E cas aki tin un cura halto y e polisnan a gare prome cu e por a trata di bula e cura. A detene mesora y el a resulta di ta DC, di 29 aña.

Polis a papia cu e dama CDA, kende a bisa cu el a scucha sonido biniendo for






HERMUS RIJSCHOOL NV
5943263 / 5826732
Hermusrijkschoolnv.com
Sividivi 1-C

Afl. **191**

di e baño. Ora cu el a bay direccion ey, el a mira un homber desconoci tabata listra den e baño. El a core bay y a activa e alarma. El a bay sconde den un otro camber pa yama su mama, kende na su turno a yama Polis. E mayornan cu a yega cas despues cu e prome sospecho-

so a wordo deteni, a informa Polis cu nan a caba di mira un homber canando pura bayendo for di e area ey y a kita su camisa. A avisa central di polis, cu a manda un patruya y a mira e homber aki den area di Rooi Santo y a para e homber, kende no por a duna un splicacion di kico

e ta haciendo. A lista e homber di fam J. Di 36 aña, y a haya un celular cu tabatin un yamada habri ainda y a resulta cu e tabata e number di e otro sospechoso.

Ambos sospechoso a wordo transporta pa Warda di Polis na Shaba y presenta dilanti Fiscal Auxiliar.

Chauffeur a dal den baki di Linear Park



DIASABRA marduga informacion a dren-ta di un accidente na Camacuri, altura di Linear Park. Na yegada polisnan ta topa cu un Kia Sportage.

E vehiculo aki maneha pa un dama lo a baha caminda cu velocidad halto y bay dal un bak di mata. Danki Dios, niun hende a resulta herida.

 Website: www.awemainta.com	 Facebook: www.facebook.com/awemainta	 E-mail: noticia@awemainta.com	 Tel: 583-1400	 Fax: 583-1444	
 Facebook: www.facebook.com/awemainta					
 E-mail: noticia@awemainta.com					
 Tel: 583-1400					

Johnson
notary services

AUCTION

ex. 3:268 Civil Code of Aruba

THURSDAY

February 8, 2018

On Thursday February 8, 2018, at 11 AM, at the Conference Room of the Chamber of Commerce, Irausquin Boulevard 10, Aruba, will be auctioned in public:

1. A residential house locally known as:

CATIRI 12-E

standing on a parcel of public land, 741 m2 in size, situated at Catiri in Aruba, locally recorded as First Division Section L number 2958. The lease rights expire on May 11, 2048

Starting price: Afl. 171.000,--

2. A residential house locally known as:

SERO BLANCO 353

standing on a parcel of public land, 808 m2 in size, situated in Seroe Blanco in Aruba, locally recorded as First Division Section P number 2290. The lease rights expire on September 30, 2052.

Starting bid: Afl. 200.000,--

Auction notary: mr. T.R. Johnson

- The auction is subject to the general conditions for foreclosure auctions and special auction conditions which will be determined by civil law notary T.R. Johnson.
- The auction will take place by raising bids (in Dutch: "bij opbod") and by decreasing bids (in Dutch: "bij afmijning"), in one session.
- Seller has the right to not accept any bid, at his sole discretion.
- Each bidder must be able to submit a bankguarantee issued by a reputable bank in Aruba to the amount of the highest bid increased with an amount equal to the auction costs.

For more information:

WWW.JOHNSONNOTARY.COM/AUCTIONS

A declara acuerdonan ehecuta den periodo demisionario di Gobierno anterior como 'nietig'

Cada ciudadano merece oportunidad igual pa bin na remarca pa tereno, cas of kiosko



MINISTER Otmar Oduber durante di Conferencia di Prensa di Gobierno di Aruba cu a tuma luga diahuebs, a amplia riba entre otro e situacion di terenonan otorga pa Gobierno anterior den periodo demisionario. 'Nos a tuma tempo pa analisa tur documentonan, acuerdonan y contractnan cu a wordo firma den e periodo de-

misionario di Gobierno. Conseheronan huridico a muestra cu Gobierno no mester a tuma decisionnan cu por perhudica e maneho di e Gobierno cu ta bin na turno. Consecuentemente, tur e acuerdonan (overeenkomsten) cu a tuma luga pa loke ta e otorga-mento di kioskonan na Welcome Plaza cu a wordo firma riba 7 di november 2017

door di e Gobierno anterior ta wordo declara 'nietig' como cu esakinan no ta conforme reglanan y ley- nan cu tin.

Mescos ta e caso cu diferente huurgronden cu a wordo firma door di e Gobierno anterior unda cu ta otorga personanan entre 20 pa 40 mil meter cuadra, cual ta bay ful contra e situacion actual cu tin pa loke ta necesidad di tereno pa por ehempel desaroyo agricultural y pa cria di bestia. Hopi persona ta buscando un pida tereno pa por eherce nan ofishi/ hobby. E maneho cu

colega Minister Chris Romero a anuncia ta uno pa haci di sector primario un pilar economico adicional na Aruba. Esaki lo wordo perhudica cu e decisionnan tuma pa loke ta tereno door di Gobierno anterior. Tur e acuerdonan aki (mas cu 20) lo ricibi carta indicando cu ta declaranan 'nietig' mirando cu e otorga-mento a wordo duna den un periodo di despedida di e Gobierno anterior.

Minister Otmar Oduber a sigui splica cu mescos a tuma luga pa loke ta e casnan y terenonan na Colony/ Sero Colo-

rado. Cu tambe den e mesun periodo aki un cantidad di hendenan cu no a pasa e proceso debido cu ta defeni na DIP pa bin na remarca pa e casnan aki, a ricibi esakinan. E personanan aki lo wordo muestra riba e situacion cu a bay robes, pa duna nan e oportunidad di aplica di nobo segun reglanan di e departamentonan concerni. Pa Gabinete Wever – Croes, ta importante pa un y tur den comunidad tin derecho igual pa bin na remarca pa sea e ta un huurgrond, kiosko, cas, entre otro.

SERVICIO SEPTICO

ecotech aruba

- Residencial & Comercial
- Servicio Rapido
- Servicio Profesional, Confiabel y Garantisa

* Prijs di Awg. 65,- te max. di 7 m³
* Prices based on 3.5% BBO BAZV.

YAMA NOS NA:
582-4684

info@ecotech.aw
www.ecotecharuba.com

Like Us On Facebook

Nos ta Acepta ATM ora di duna septic service

Problema entre bisiña na Seroe Patrishi

DIASABRA den oranan di mainta un patruya di polis ta wordo manda na un adres na Seroe Patrishi pa un caso di problema di bisiña.

Na yegada e patruya enberdad ta bin comprende cu ta trata di un caso di destruccion. Dos bisiña a haya problema cu otro y un di nan a mira con e otro bisiña a destrui su glasn di auto y windshield cu piedra.

Despues cu polis a bay na e cas di esun cu a comete e destruccion, e no lo tabata na su cas y no tabata contestando ora polis a yam'e. Polis a tuma tur datos y a sigui.

Poco dia pasa caba tabatin dos caso di destruccion di spiel di auto na Seroe Patrishi y di personanan cu tabata biba na e meun cas. No ta conoci si esaki tin di haber cu e otro casonan.




Chauffeur a bay di sitio despues di accident



DIASABRA marduga polisnan a bay Alto Vista, caminda un Nissan March a dal contra un palo luz. Na yegada e chauffeur no tawata na e sitio mas, segun testigonan e lo a baha cana bay nort. Segun polis por a saca afo ta cu, e chauffeur lo a perde control den un bocht y a bay dal contra un palo di luz. Parse cu e chauffeur no ta biba mucho leu di unda e incidente a tuma luga. Polis a bay tira bista na e adres y tawata net momento cu familiarnan tawata bay hiba e chauffeur pa Eerste Hulp.

Auto cu a dal den Dakota Shopping Paradise a keda total loss



DIASABRA mainta polis y ambulance a bay altura di Dakota Shopping Paradise, pa un accidente basta serio.

Polis a compronde na e sitio cu e vehiculo aki tawata bayendo abou cu velocidad halto y a perde control baha caminda na su man drechi. Y a bay dal contra muraya di Dakota Shopping Paradise, causando hopi destrucion.

Den e auto tawata tin tres persona.

Un di e tres personanan no tawata desea atencion medico, e otro dosnan si.

Loke sa pasa varios biaha

E momento eyan no tawata tin niun ambulance disponibel. Pick up mobiel di Ambulance si a presenta.

Mirando cu ambulance lo no yega na e sitio e momento ey, personal di ambulance cu a yega cu e pick up a duna personal di Rode Kruis ok pa transporta e heridonan pa hospital.





Corant AWEMainta ta busca un Layout Designer

Si bo ta un persona cu
Tin experiencia den InDesign, Photoshop, Illustrator

- Ta Creativo
- Tin iniciativa propio
- Por traha den team
- Por traha anochi
- Por traha bon bou presion
- Mester tin su transporte propio

Pa aplica manda bo CV na:
Lissenne@awemainta.com



Cinco hoben di BYOF ta bay presenta na Aruba

Trabounan di mantencion na Casita Geel a cuminsa

Choller a causa destruccion y horta den Isla Pop



DIASABRA den oranan di mainta, polis ta wordo manda na e establecimiento di Isla Pop na L.G. Smith Boulevard pa un caso di kiebrot y ladronia.

Na yegada e patruya ta bin compronde cu aparentemente un choller lo a kibra un porta di glas drenta paden y pasa man pa un flatscreen. No ta prome biaha cu e estab-

lecimento aki ta bira victima di ladronia, ta varios biaha desconocidonan a comete kiebrot y ladronia den e establecimiento aki.

Despues cu Polis a tuma tur e datosnan, nan a sali bay busca den e area pa e choller cu lo a comete e kiebrot y ladronia aki, pero sin resultado.

Servicio pa Comunidad



Emergencia

Brandweer 911

Polis 100

Polis Oranjestad 102

Polis San Nicolas 104

Polis Santa Cruz 105

Polis Shaba 107

Polis Tipline 11141

Ambulance San Nicolas 584-5050

Ambulance Sasaki 582-5573

Ambulance Wayaca 582-1234

Hospital 527-4000

Centro Medico San Nicolas . 524-8833

SVB (AO-Ziekmelding) 527-2782

Botica na Warda

Pabou di Brug:

Del Pueblo

Pariba di Brug:

San Lucas

Dokter na Warda

Pabou di Brug:

-

Pariba di Brug:

-

Servicionan

ELMAR Storingdienst 523-7147

SETAR Storingdienst 117

Digicel 145

WEB Storingdienst 525-4600

Reina Beatrix Int'l Airport 524-2424

Serlimar 584-5080

Arugas 585-1198

Guarda Costa 913

Funeraria

AD Patres 584-2299

Aurora 588-6699

The Olive Tree 582-0000

Fundacion

Rode Kruis Aruba 582-2219

FADA 583-2999

Fundacion Respeta Mi 582-4433

Fundacion Guia Mi 587-1677

Muhe den Dificultad 583-5400

Telefon pa Hubentud 131

Centro Kibrahacha 588-3131

Stichting Bloedbank 587-0002

Mary Joan Foundation 588-9999

Koningin Wilhemina Fonds ... 582-0412

Fundacion Pa Nos Muchanan.. 583-4247

Cas Editorial



The Media Group

Margrietstraat #3

Oranjestad, Aruba

Tel: 583-1400 Fax: 583-1444

Orario di Oficina

Dialuna - Diabierna

8am - 5pm

Cuenta di Banco

CMB #22982600

E-mail

Redaccion: noticia@awemainta.com

Aviso: aviso@awemainta.com

Subscribi na: notica@awemainta.com

Director

Victor "Toko" Winklaar

Victor R. Winklaar

Ministerio di Otmar Oduber ta splica cu

Maneho di kioskonan basa riba elevacion di producto Aruba na bienestar di nos tur

PA trece aclaracion riba diferente discusion den medionan di comunicacion relaciona cu e kioskonan cu no ta basa riba hecho. Ta informa di e vision pa cual a desaroya e kioskonan riba Welcome Plaza, cu ta forma parti di e vision pa eleva calidad di producto Aruba promoviendo nos cultura.

Minister anterior di Turismo y Cultura a duna publicamente informacion di e maneho cu ta enfoca riba eleva e producto turistico di Aruba. Conhuntamente cu partnernan cardinal den e sector turistico a tuma e decision por medio di plannan manera 'two steps ahead', e enfoke di San Nicolas como ciudad di herencia y cultura. Tambe e plan di maneho di e Ministerio pa hisa e calidad di producto Aruba, pa ha-



cie un producto di calidad autentico.

Enfocando riba autenticidad ta unda cu e estimulacion di sector cultural a tuma un rol central. Estimulacion di e sector cultural a tuma lugar den diferente forma den cual un di e forman aki tabata pa promove e posicion di e arte-

sano (comunica y publica desde 2013).

E maneho general y desaroyo di e Welcome Plaza tabatin di haber cu e elevacion di e producto turistico unda cu ta duna e turista crusero y otronan den e area e oportunidad pa conoce elementonan autentico

di Aruba. Pesey e enfoka ta riba artesanonan y artistanan local cu ta contribui na e calidad di Aruba como producto turistico y nos economia. Pues considerando tur cos, e maneho ta uno basa riba salvaguardia e producto Aruba pa tin un economia prospero na bienestar di nos tur.



**Sintonisa tur merdia e duo di periodista
Alexa Werleman y Victor (Toko) Winklaar
Den Noticia na G-FM 99.9**

**Di dialuna pa diabierna
cu noticia sin miedo**



Consul General di Merca staciona na Corsou a bishita EcoGas

Margaret D. Hawthorne a keda impresiona cu e desaroyonan rond di energia renoba y maneho di desperdicio



ECOGAS a ricibi bishita di Consul General di Merca di cual e gerente di e planta, Ramsey Halabi, a topa cun'e.

Margaret D. Hawthorne, "US Consul General and Chief of Mision to the Dutch Caribbean", a ricibi un recorido p'e haya sa kico tur ta haci den e planta. E merdia tabata uno masha ameno mes, unda cu Ramsey Halabi a splica di e trabounan di preparacion, e reto, e logronan y e forma profesional con ta procesa desperdicio y deshaci di dje na un forma eficiente.

"El a keda hopi impresiona. E ta hopi den e mundo di waste energy", asina Ramsey Halabi a expresa despues di e encuentro.

Margaret Hawthorne ta fascina cu e mundo ey y e ta hopi interesa den dje. Tambe e sa hopi di e materia aki. E combersacion tabata uno ameno di cual hopi idea a bin dilanti, pero Margaret Hawthorne tambe a bin cu idea y sugerencianan riba mesa, locual EcoGas a aprecia. A cana rond cu e Consul, p'e mes admira y experiencia con e planta ta funciona.

E tabata na Aruba pa reuni cu e Gobierno nobo, pero tambe cu companianan y otro individualnan.

"Awe mi a pasa un atardi agradabel aki na EcoGas cu Ramsey Halabi", asina el a duna di conoce.

E tabata hopi interesa den energia y e representante di Gobierno di Merca tambe tabata interesa den seguridad y tambe den energia renoba.

Tambe nan tin interes riba kico Caribe ta haciendo cu energia.

Margaret Hawthorne a bin pa mira y scucha kico EcoGas ta haci cu inovacion y ideanan nobo con pa genera energia. Tambe con pa deal cu e reto cu hopi isla tin, esta con pa lidia cu desperdicio.

E bishita aki realmente tabata un "eye opening" y emocionante. Tambe e tabata un experiencia pa scucha kico tur ta haci na EcoGas, algo practicamente unico na mundo pa loke ta maneho di desperdicio.

EcoGas t'e prome fabrica di gasificacion di su tipo den Caribe y Latino America, pero tambe Norte America. Meta di EcoGas ta pa baha e can-

tidade di desperdicio nobo cu ta deposita riba dump.

Un otro meta ta pa EcoGas sirbi como ehempel pa otro paisnan y bende e experticio cu otro pais y companianan den exterior.

Aruba actualmente tin 100 pa 110 mil ton di sushi anualmente cu por procesa den e planta. Esaki ta exclui sushi manera santo, piedra, concret, etc. cu ta wordo procesa na un otro forma.

Pa un isla manera Aruba cu 100 mil habitante y un miyon turista pa aña, esaki ta un cantidad hopi grandi di desperdicio, pero mester tene semper den mente cu Aruba ta importa tur cos y no ta fabrica nada cu ta uza e materialnan importa localmente. Hasta paña cu no ta wordo uza mas ta wordo tira afo, tanten cu na hopi otro pais hasta paña ta wordo recicla y exporta.

EcoGas ta traha cu personal tecnico bon entrena, y ta sigui train mas personal p'asina nan ta cla pa exporta e experticio pa otro pais y companianan interesa den sigui e pasonan di EcoGas.

Reconocimiento anual na miembronan di ekipo di Hilton Aruba Caribbean Resort & Casino



E recepcion di fin di aña reconociendo esunnan cu mas a destaca entre e miembronan di ekipo recientemente a tuma lugar den e Grand Caribbean Ballroom cu algun bebida y snacks riba un diabierna atardi despues di trabao. E miembronan di ekipo cu nan desempeñonan a destaca den 2017 a wordo elogia publicamente y nan a wordo presenta cu un certificado di exelencia bon mereci.

E ganadornan di aña 2017 ta como lo siguiente; Norma Lacle y Suzanne Beaumont, Food & Beverage; Anselmo Webb, Kitchen; Sofia Palacios, Pool, Beach & Spa; Vicaria Rafael, Front Desk; Dexter Scott, Engineering; Karminah Samingoen, Human Resources y Fernando Giraldo, Housekeeping. Nan respectivo hefe nan di departamento a contribui na e programa di e anochi aki compartiendo storianan grato y anecdotan cu ta describi e caracteristicanan special cu e ganadornan ta dispone di dje, cu a hasi cu nan merece e reconocimento tan codicia. Entre e mihor supervisor nan di e hotel tin: Jorge Barros, Food & Beverage; Grace Geerman,

Rooms; Eugenille De Marchena, Administration y Benito Croes, Kitchen. E miembronan di e ekipo diligente a distingui nan mes durante 2017 demostrando un excelente liderazgo y cu por funciona optimal, y asina nan ta gana e distincion di Supervisor di Aña. Entre gerentenan di departamento tin: Marilu Erasmus, Food & Beverage; Marielle Smeets, Rooms; Angelique Croes, Administration y Ckaren de la Cruz, Reservations, nan a gana e honor maximo di Manager di Aña pa nan etica di trabao impecabel y pa nan maneho efectivo di nan departamento.

Gerente General Hans Georg Roehrbain a felicita e ganadornan den su discurso, yamando nan heroe; e la reconoce e desafionan cu nan ta encontra nan mes cune ora di maneha e ekipo di nan departamento, tur e entrada- y costonan, y tambe e relacion cu clientenan na un hotel cu semper tin un ocupacion halto. Hilton Aruba Caribbean Resort & Casino ta un di Aruba su cadenan di hotel mas grandi y cu ta reconoce tur e contribucionnan valioso cu tur e miembronan di ekipo di tur rango ta hasi, un



biaha pa luna y despues atrobe na fin di aña presentando nan e honor maximo. Como un di e nombrenan mas reconoci den e industria di hospitalidad, Hilton Aruba Caribbean Resort & Casino ta ofrece biaheronan un mundo di experiencianan autentico. cu e virtud di e miembronan di ekipo local y con nan ta continua na inova, protegiendo e hospitalidad tradicional di Aruba. Hilton Aruba Caribbean Resort & Casino ta aspira pa crea experiencianan caminda cada huesped y como tambe cada miembro di ekipo ta sinti nan atendi, balora y respeta.

Dobel celebracion na Botica di Servicio y su afiliado Laboratorio di Servicio

BOTICA di Servicio y su afiliado Laboratorio di Servicio recientemente tawatin celebracion di dos persona cu a destaca den nan carera. Dos empleado dedica na nan trabao a cumpli 25 aña y 5 aña den servicio respectivamente y a wordo reconoci pa nan tantisimo contribucion tur dia na e compania.

Mientras cu Doris Geerman tawata e focus di atencion pa cumpli 25 aña na Botica di Servicio, su yiu muhe Tibisay Croes-Geerman a wordo elogia pa cumpli 5 aña na Laboratorio di Servicio. Tanto mama como yiu ta comparti e mesun balor di diligencia y dedicacion. E similaridadnan no ta caba eynan; ambos ta empleado di e mesun compania y ambos a celebra nan carera riba mesun fecha.

Y manera cu Michelle Obama a expresa recientemente: "There is no magic to achievement; it's really about hard work, choices and persistence". Aruba Growth Fund Foundation, kende ta propietario di Hilton Aruba Caribbean Resort & Casino, Botica di Servicio, Laboratorio di Servicio y Op=Op Voordelshop ta determina pa continuamente introduci producto- y servicionan di calidad pa e comunidad di Aruba, como tambe riba e tereno di salud.

Como un compania completamente Arubiano, financia pa inversionistanan Arubiano, nan focus ta pa inverti den negoshinan local y asina contribui na bienestar di nos isla.



Reconocimiento na sra. Tecla Kelly tabata peticion di Prome Minister Evelyn Wever-Croes

STICHTING Como un custom-ber di tur aña e organisacion ta invita e Prome Minister di nos pais pa haci e acto di coronacion di Reina Grandi di nos Carnaval.

Maneho di Aruba su Carnaval (SMAC) for di momento cu a tuma organisacion di Carnaval di Aruba over, tabatin como unico meta pa engrandece e celebracion cultural aki.

Carnaval t’e fiesta di cultura mas grandi cu nos tin y p’e motibo aki e organisacion ta traha cu vision pa trece union den henter e pueblo pa loke ta trata Carnaval.

Prome Minister sra Evelyn Wever-Croes despues di a haya e invitacion aki for di SMAC, a haci un peticion special n’e organisacion di Carnaval. Cua peticion for di principio no tabata un problema pa SMAC.

Prome Minister Wever-Croes su deseo tabata pa entrega un reconocimiento den nomber di Gobierno di Aruba y di pueblo di Aruba, na sra. Tecla Kelly pa tur su trabounan cu el a haci pa brinda Aruba tremendo tempo-radanan di Carnaval aña tras di aña.

Ningun momento a pensa riba e discordia cu lo ta existi entre e dos orgnisacionnan, sino un momento na unda durante un actividad Carnavalesco y dilanti e publico grandi, duna gradicimento na un persona cu a traha asina duro y cu ta nifica hopi pa Aruba su Carnaval.

Sinembargo, sra Kelly a rechasa e invitacion aki di e prome mandatario di nos pais y a tuma esaki como un ofensa na su persona y a bay diferente media di comunicacion treciendo e sentimiento di desunion inecesario den nos pueblo.

SMAC reaccionando riba e comentario di sra. Tecla Kelly cu SMAC lo a lanta riba bon pia p’e placa cu nan a ricibi na inicio di nan trabou, a duna di conoce cu nan ta hopi orguyoso cu cada aña SMAC ta traha un jaarrekening cua nan ta entrega na sponsornan y na Gobierno di Aruba y asina a cumpli semper cu e transparencia cu e gruponan tabata kier a mira.


Segun e gruponan den pasado esaki no

tabata pasa y no tabatin transparencia den maneho di Carnaval.

Cumpliendo cu e transparencia desea, SMAC ta bin bek tur aña cu e jaarrekening y duna cuenta n’e Minister di Cultura na kico e placa a wordo uza. Pa cua motibo tambe Gobierno ta inverti den e actividad cultural di mas grandi di nos pais desde inicio di e organisacion aki. Mescos tambe, cada sponsor y lider di grupo cu ta na cabes di Gruponan Uni ta ricibi e jaarrekening.

SMAC ta lamenta cu sra Tecla Kelly a considera e invitacion di Prome Minister di nos pais como ofensivo na su persona. Esaki no tabata e caso ni di nos Minister President ni di SMAC.

Sra. Tecla Kelly ta keda un persona cu a dedica su tempo na nos Carnaval y tin su lugar den historia di e celebracion cultural aki.

<div>BANCO DI CARIBE</div> <div>OFFICIËLE KOERSEN TEN OPZICHTE VAN DE ARUBAANSE FLORIN</div> <div>GELDIG OP 2 Feb, 2018 EN TOT NADER ORDER</div>				
valuta	aankoop van publiek			verkoop aan
	bankpapier	wissels, CHQ's reischeques en overboekingen		publiek
Ned. Antil. Gulden ANG Per ANG 100	98.00	100.00	biljetten chq./overboeking	100.20 100.00
Amerikaanse dollar USD	1.77	1.78		1.80
Canadese dollar CAD	1.42	1.44		1.46
Zwitserse frank (per 100) CHF	191.71	192.43		193.23
Pond sterling GBP	2.47	2.52		2.58
Japanse yen (per 10.000) JPY	160.67	162.14		163.77
EURO (per 100) EUR	220.48	222.49		224.72
Deense kroon (per 100) DKK	28.92	29.64		30.44
Noorse kroon (per 100) NOK	22.25	22.97		23.77
Zweedse kroon (per 100) SEK	21.65	22.37		23.17

Campana a guli lenga den reunion cu CAFT

AVP a pasa den un berguensa mirando con CAFT a frega e cifranan financiero devastador bao di nan nanishi

Di acuerdo cu MEP

	Presupuesto 2001	Presupuesto 2002
Surplus ficticio	1.5	5.7
Deficit real	-167.8	-206.3

	Presupuesto 2017	Presupuesto 2018
Deficit (Surplus) ficticio	-25	25
Deficit real	-130	-275

DESPUES cu henter comunidad a tuma nota di e relato devastador di CAFT riba e situacion financiero desastroso cu Gabinete Eman a laga atras y cu un biaha mas e dobel seis di AVP a horca, no ta keda e fraccion di AVP y tur esnan cu ta defende e partido aki ciegameente nada otro mas di hinca nan cara di berguensa den tera, cuminsa samina nan consenshi y realiza den ki desaster y ruina financiero nan a hinca nos pais aden durante e ultimo 8 añanan.

Asina MEP ta menciona den un comunicado di prensa.

GOOCHELEMENTO CU CIFRA

Sinembargo tur locual partido AVP a haci durante nan 8 aña di malgovernacion no ta nada nobo, ya cu e barbaridadnan aki nan a comete tambe den nan gobernacionnan anterior, manera p.e. na 2001, caminda nan a manipula y goochel grandemente cu cifranan financiero, bisando entre otro cu nos pais supuestamente lo tabatin un surplus di 1.5 milyon florin na 2001 y un surplus di 5.7 milyon florin na 2002.

Sinembargo ora cu e Gobierno di MEP na 2001 mediante un Comision Financiero a laga investiga nos finansa publico, a bin resulta cu pais Aruba tabatin un deficit di -167.8 milyon florin den e presupuesto di 2001 y den e presupuesto di 2002, un otro deficit di -206.3 milyon florin cu AVP a laga atras.

Y e gobierno di MEP di e tempo ey mester a traha hopi duro y haci hopi sacrificio pa trece nos finansa publico bek riba pia.

NAD’UN CAMBIA PA AVP

Awor na aña 2018, CAFT a haci su analisisnan y a resulta cu na 2017 pais Aruba lo no conoce un deficit di -25

milyon florin y tampoco lo bay tin un surplus di 25 milyon florin na 2018 manera cu tur dia e fraccion di AVP hunto cu nan defensoran di maldad ta propaganda.

Hecho ta cu CAFT mes a declara cu na 2017 pais Aruba lo tin un deficit di -130 milyon florin y pa 2018 esaki lo bay ta -275 milyon florin.

Tur e cifranan espantoso aki a ser frega bao di nanishi di e 4 parlamentarionan di fraccion di AVP cu tambe tabata den reunion di e Comision Financiero di Parlamento hunto cu CAFT diabierna ultimo, segun MEP.

Pero kico nos por a mira? Durante e reunion di CAFT tur e 4 Parlamentarionan aki di AVP a bira mudo, no a bisa nada pa defende nan gobernacion di AVP y ta parece cu campana a guli nan lenga por completo.

BERGUENSA A COY NAN CURPA

Siguramente berguensa lo a coy nan curpa y nan lo a pidi pa tera habri nan dilanti den e reunion cu CAFT. Ta straño si cu un Richard Arends kende ta pretende di t’e gran experto riba tereno financiero tampoco a hiba palabra y ta warda te ora p’e siman aki habri p’e bay den conferencia di prensa y cuminsa lansa su mentira y manipulacionnan di custumber, pero den e reunion cu CAFT e tabata manera un pushi mondi, keto keto!

Awor cu CAFT a papia idioma cla y cu tur cifra di otro instancianan manera Banco Central, Controlaria General, IMF cu prueba a mostra riba e hecho cu AVP a desgracia e pais aki financieramente, lo ta na su lugar pa henter partido AVP realiza cu nan credibilidad den pueblo a baha drasticamente y a cay te na suela y cu a yega e momento tambe pa nan recapacita, stop di sigui manipula y venena mente di pueblo bisando cu nan a hiba un maneho financiero saludabel y solido.

Finalmente, un consejo na AVP: “Boso para un banda y wak con e gobernacion actual lo bolbe salba e pais aki poniendo orden den henter e desorden financiero cu boso a laga atras na final di 2017”.

Parlamentario Endy Croes relaciona cu reunion di IMF:

Parlamentarionan di AVP ta comportando nan mes manera “SHISHI”

PARLAMENTARIO Endy Croes ta bolbe enfatisa cu e lo no laga AVP pasa ningun fastball y lo sa di reacciona na tur momento pa corigí AVP su engañonan. Recientemente Parlamentarionan a pasa den un siman basta pisa cu entre otro reunionnan cu Algemene Rekenkamer (ARA), Directie Financiën, Raad van Advies, Centrale Accountants Dienst (CAD), CAFT, IMF pa nombra algun. Iniciando cu IMF kendenan a haci un bishita orientativo pa cera conoci cu Parlamento nobo y Gobierno nobo. Pues no ta un bishita di acuerdo cu artikel IV di IMF, esta un mision consultativo. Esaki ta tuma lugar cada dos aña y Aruba ta toca turno pa esaki den 2019.

Locura y barbaridad

Locual ta remarcabel cu Fraccion di AVP tambe a ricibi algun minuut pa cera conoci cu IMF. Sinembargo e malesa patologico di engaño a resalta y nos a comproba cu esaki a contagia entre otro e hoben Richard Arends, kende tin aspiracion pa bira lider di AVP. Na salida di nan bishita Richard Arends ta declara cu Staff di IMF a pidi Fraccion di AVP for di oposicion pa concretisa un Plan Financiero. Ki locura y ki barbaridad!! Ken lo por kere e bagamundo aki? Tambe Richard ta declara cu AVP a haya oportunidad cerca IMF di trece nan preocupacion cu nan tin riba tereno financiero. Mi ta sigur cu Staff di IMF lo a “TIK” Richard hopi duro “op zijn lange vingers”. IMF sa mucho bon cu ta AVP a hinca e pais aki den e debacle financiero conoci tambe bou di e

number “Desaster Financiero” actual.

Redoblacion di debe


Hustamente Richard Arends desde edad hoben a profila den Fundacion FESCA di AVP kendenan na 2009 a presenta un Presupuesto Alternativo pa Aruba, unda lamentablemente pueblo di Aruba a cay den nan trampa. Resultado final di Richard Arends y AVP, despues di gana eleccion na 2009 y a aplica nan presupuesto alternativo, tabata cu nos debe nacional a redobla. Esaki ta e tristo realidad! Na 2009 MEP a laga e debe nacional na 43% den cuadro di tur standardnan internacional, esaki ta resultado di 23 aña di gobernacion desde 1986, esta desde Status Aparte. AVP sin gevoel den 8 aña di nan gobernacion ta “REDOBLA” esaki sin misericordia pa alcanza un debe nacional di 87% den 2017.

Actitud infantil

Como prueba Parlamentario Endy Croes ta recomenda pa scucha e conferencia di prensa di diabierna ultimo di CAFT, momento cu e presidente Sr. Raymond Gradus a bisa “Overheidsschuld is gestegen naar 87% van de BBP in 2017”. Pueblo saca Bo som! Segun Parlamentario Endy Croes cu e tipo di comportacionnan aki pa troce palabra di IMF y purba engaña pueblo estilo di e politica anticua di Henny y Mike Eman mester pasa pa pasado. P’esey Parlamentario Croes ta condena e actitud infantil di Richard Arends y Fraccion AVP comparando nan como un Fraccion di “SHISHI”. A buen entendedor pocas palabras.



Accidente cu hopi daño material



DIADOMINGO merdia algo prome cu al'or polis y dos ambulance a bay crusada conoci pa accidente na R.C.A.

Na e sitio polis ta haya dos auto cu basta daño material, tawata trata di un Kia Sportage y Jeep Liberty.

Den e Jeep dos persona a resulta levemente herida, ta trata di un adulto y un mucha.

Segun nos a compronde na e sitio e Kia Sportage a yega subi e crusada y dal Jeep Liberty cu tawata bayendo nort.

Dos persona a resulta levemente herida y ambos a wordo trata door di personal di ambulance y despues transporta pa hospital.

Dia di aprecio na La Cabana Beach Resort & Casino ta enfoca riba e buskeda di excelencia





DIA di aprecio na La Cabana Beach Resort & Casino a encera un asamblea festivo den e sala di conferencia. E evento a conta cu palabranan di bon bini y un mensahe di seguridad di e Gerente General Joe Najjar, un discurso motivacional door di Recurso Humano, un rifa atractivo, un ceremonia di premiacion poniendo hotel su streanan den centro di atencion, y finalmente, como e tradicion, e evento anual di eleccion di reina. Najjar a yama un caluroso bon bini na tur e asociadonan, reconociendo nan tantisimo contribucion y nan compromiso total na huesped- y coleganan.

E hotel ta track nan score di customer satisfaction via Medallia paso Medallia ta un sistema efectivo pa maneha e customer experience, e ta capta feedback di huespednan y transforma e datos den vision den real time.

Siguiendo e lista di logronan pa 2017, metanan nobo a wordo estableci pa e proximo aña y algun di e balornan central a wordo revisa, atendiendo e 'Why', 'How' y 'What' di

La Cabana Beach Resort & Casino, den su trayecto cu ta dirigi pa laga e huespednan sinti nan mes na cas, compartiendo e pasion di hospitalidad, respondiendo na tur nan necesidadnan, garantizando nan seguridad, transmitiendo confianza total y pone nan sinti special.

Entre e asociadonan mas menciona riba Medaya di cada departamento tin:

Front Desk, Roderick Martis; PBX, Sheryl D'arsie y Alexandra Werleman; Housekeeping, Yolanda Boekhoudt; Engineering, Ricky Lont; Security, James William; Activities/Health Club, Nixon Castillo; Food & Beverage, Gareth Rosa y Roshaline Croes; Owners Services, Desiree Henriquez; Accounting, David de Cuba y Mauro Yanes; Bluegreen, Carolyne Geerman y Executive Office, Jessica Franken. Esun mas menciona riba Medaya di e hotel completo ta Angel Santos kende a ricibi un bunita premio pa su briyante funcion laboral.

Na e evento tambe a reconoce asistencia perfecto cual a bai pa Mildred Clemencia, Top F&B sellers a bay pa Vicente Guerrero, Manolo Valdez y Jandor Lampe y esun cu mas a destaca den cushina ta Maria Maduro. Entre e dsitincionnan na Front Desk tin: Nicole Ramirez, Geegee Jaranilla y Janet Reid cu a destaca den check-ins, check-outs y upselling.

Otro logronan cu a wordo elogia ta inclui e Housekeeper mas solicita, Dolores Flores; Engineering cu ta responde mas liher, Adilio Diaz y Ainsley Murray. Security cu ta responde mas liher, Christ Carolina y Marlon Clemencia.

E lunch cu e mihor tema a wordo plania pa Accounting.

Otro reconocimentonan importante cu a wordo anuncia anteriormente tawata pa Asociado, Supervisor, Manager & Team, di aña di 2017, cual a bai pa Nixon Castillo, Annur Kock, Dave van der Veen, Gisella Pallares y e di cuarto piso di team di Housekeeping.

Na e evento tambe a elogia Jason Martijn cu ta e persona cu ta tras di e 'Thumbs up Program'; Elvin Figueroa y Sandra Gacusan kende nan a yuda cu e graduadonan, a yuda cu e Social committee/ Green & Health committee / ET/ y Safety committee. Ademá tin e dos departamentonan cu mas a mehora cual ta Owners Services y Housekeeping. Y pa clausura, e departamento cu a score mas halto den AOS ta HR/Exec Office. Tur ganador a ricibi applauso y un muestra di aprecio.

Asociadonan a responde cu un entusiasmo grandi ora e hotel su mision y su balornan principal a wordo comparti.

Na final di e evento e reina di Carnaval di e aña aki a wordo elegi entre 5 candidata na Pata Pata Bar. E reina Lixandra Geerman hunto cu prins Nixon y pancho Alexis di Activities a uni nan mes cu e otro candidatanan Azucena Struikelblok di Housekeeping, Nicole Ramirez di Front Office, Miriam Fernandez y Maria Maduro di F&B y asina a baila y goza cu Quality Brassband, invitando huespednan pa join e fiesta.

Riba potretnan por aprecia algun momento di e celebracion productivo y informativo.



Swing cu AWEMainta



Un Jouvert Morning cu atendencia grandi

JOUVERT Morning, of “Jouve” manera e ta wordo yama den pueblo, ta un parada di Carnaval cu a pasa den su temporadanan malo, pero cu den e ultimo añanan a sa di “pick up” y awor na 2018 a conta cu un asistencia grandi.

Contando cu un total di 7 banda musical, e cayanan principal di San Nicolas a baila na e ritmo di soca for di oranan tempran di madrugada.

E grupo cu indudablemente a conta cu mas sostenedor tabata Le Groove, pero sin kita cu e otro bandanan tambe a sobresali cu nan ambiente unico.

Si despues di esaki, Polis tabatin man yen cu cantidad di pelea, cu ta dañá pa otro.

Swing cu AWEMainta



Aruba a disfruta di un bunita "Lighting Parade"



E cayanan di Oranjestad tabata e sede principal, manera tur aña, di e bunita y legendario "Lighting Parade.

Contando cu un total di 10 grupo participante, Aruba's Lighting Parade a sali pa 8'or en punto di anochi.

Un parada yen di creatividad y hopi colorido, unda cu e luho y e lusnan no por a falta. Cada grupo a presenta nan tema di un manera unico, aportando asina pa mantene nos Lighting Parade vigente.

Gruponan participante tabata:

TOB Carnival Group – Rise of the Phoenix
 Royal Carnival Group – Witches & Wizards
 Empire Carnival Group – Garden of Eden
 OPC Carnival Group – Aruban Heritage
 Los Laga Bay – King Robert's Army
 Champagne Carnival Group – Wings of Hope
 Dushi Carnival Group – Jewels of the Caribbean
 Pink For Life Carnival Group – Zulu Warriors
 Infinity Carnival Group – Voyage to India
 Chelo Loco

BWM tabata e banda encarga cu e lastlap cu a conta cu un gran cantidad di persona su tras.

TIME OUT VARGAS, awe dialuna 5 di februari den Time Out. Con leu nos ta den deporte aki na Aruba. Kico mas por ser haci? Y tambe con nan a trata e lesion di Chiara Petrocchi. No perde hopi interesante.





Swing cu AWEMainta

Maria Valentina Piternella reina di Ceque College



Swing cu AWEMainta



E aña aki un biaha mas Aruba Bank a ricibi diferente peticion di sponsor di scolnan pa cu carnaval. Aruba Bank a sostene Ceque College cu nan celebracion di carnaval. Tambe Aruba Bank tabata presente na e eleccion di reina di Ceque College. Maria Valentina Piternella a bira reina di scol y tambe el a cu bay best speech, best show y best costume, mientras cu Lunah Hurkmans tabata e 1st runner up.



Desde 10:00am te cu 1:00pm e studiantenan tabata apoya e cinco reinanan cu a participa. Cada participante a bin cu diferente tema, unda cu nan trahe tabata di materialnan recicla. E participantenan tabata Rushelly Galan Galindo di klas 1C, Maria Valentina Piternella di klas 2B, Noelia Orman di klas 3C, Elvira Terrones di klas 1A y Lunah Hurkmans di klas 2C.

Representante di Aruba Bank, Stephanie Camacho, a forma parti di e panel di hurado y pa por a scoge e reina di scol no tabata uno facil. Aruba Bank ta sigui sostene e Carnaval cu ta parti di cultura di Aruba. Nos ta contento di por a aporta na e evento di positivo aki pa hobennan. Tur estudiante a pasa un momento ameno. Aruba Bank ta felicita tur participante y ganadonan pa un bunita eleccion.

Aruba Bank ta desea tur hende pa disfruta di Carnaval y gosa esaki sanamente.





Como Presidente di filial petrolero...

Ex Director di PDVSA tin miónes na Corsou



WILLEMSTAD – Siman pasa den sede di PDVSA na Caracas, Polis Venezolano a arestá e Presidente di un filial di Petróleos de Venezuela (PDVSA) di acuerdo cu un circulario interno cu a circulá den e compania. Ministerio Publico a laga arestá Francisco Jimenez, kende ta director di Bariven, e compania filial di PDVSA y kende tabata encargá pa cumpra y paga tur material di PDVSA y su companianan filial tabata usa. Ministerio Publico tin basta dia ta investigá corrupcion di e funcionarionan cu Gobiernu Chavista a pone den e puestonan halto den e empresa di Gobierno y a constata casonan grandi di corrupcion.

Francisco Jiménez, t'e maximo hefe di Bariven y nan a aresté hunto cu Joaquín Torres, otro ehecutivo di e compania filial.

Nan t'e dos ultimo funcionarionan cu a keda arestá hunto cu como dos dozijn funcionarionan halto cu Ministerio Publiko a laga arestá, lagando e Alto Mando di PDVSA yen di vacatura.

E fiscal general y otro miembronan di e poder ehecutivo di Presidente Nicolás Maduro a priminti di combati corrupcion den e compania petrolero cu te fuente mayor di divisa pe pais y cu practicamente t'caha fuerte di Gobierno.

Oposicion a reclamá Maduro cu awor numa despues di mas cu 10 aña Fiscal kier arestá e ehecutivonan, kendenan a bin ta hòrta y practicá corrupcion abiertamente.

Pero den e caso aki no ta corrupcion nan kier combati sino ta lucha interno tin entre e varios grupo pro y kontra Maduro.

Siman pasá autoridadnan Españó a arestá un èx Vice Minister Venezolano y tres èx ehecutivo di companianan di estado pa labamentu di placa y corrupcion. **Ta for di 2015 a bin ta denunciá cu Bariven ta un centro di corrupcion despues cu autoridadnan Mericano a arestá dos Venezolano, pasobra nan a violá e ley di corrupcion di stranhero na Merca.**

Ambos a admiti cu nan tabata paga soborno na funcionarionan di PDVSA pa haña contract gordo serca e compania Bariven.

Mientrastanto a sali na clá cu e tres ehecutivonan cu nan a arestá a depositá miyónes di dòlar na Andorra y Corsou.

Esey a sosodé entre 2008 y 2014 di acuerdo cu informacion cu nan a divulgá

den e corant El Pais di Spaña respaldá cu documentonan bancario cu nan tin den nan poder.

Ta trata di Luis Carlos León Pérez, èx Director di Finansa di un filial di PDVSA, Electricidad de Caracas, kende ta detené na Spaña y cu Merca ta busca.

Francisco Antonio Jiménez, tambe a cay preso pa corrupcion siendo Presidente di Bariven.

Nan tabatin cuenta na Banca Privada na Andorra (BPA), caminda León a pone 22 miyon dòlar y e Vice Minister di Petrolí bou di Chávez a cobra 5,5 miyon dòlar di e suma.

Jiménez tin cuenta bancario na Corsou y Andorra. No ta solamente na Corsou nan tabatin cuenta di banco, pero tambe na Suisa, St. Vincent y Grenadine y Merca.

Un di nan ku yama Caruyo, a haña 30,6 miyon dòlar depositá riba su cuenta di banco, pero e mester a parti'é cu otro gran hefe Chavista. Hues na Spaña tin tur e documentonan. Fiscal General di Venezuela a informá cu e hendenan aki a hòrta y a laba 4200 miyon euro via banco na Andorra.



E mes ta dañá pa esnan inosente....

E Venezolano Villavicencio ta na Corsou únikamente pa hòrta

WILLEMSTAD - No a tur Venezolano cu bin Korsou ilegal ta bin pa cometé fechoria sino pa hui dje miseria i falta di alimento i kriminalidat ku ta reina na Venezuela bou di e gobernashon comunista ku tin.

Un ku sí a bin Korsou pa kometé fechoria ta Cesar Cumare Villavicencio, kende foi dia ela a pisa suela di Kòrsou, biniendo for di Venezuela, el a kai den aktonan kastigabel, pasobra e ta metí den mas ku 11 kaso di aktonan kastigabel ku vários atrako kometé den Witteweg, Castorweg etcetera.

Si Cesar Cumare Villavicencio a sali Venezuela bin Kòrsou ku e intenshon pa buska un mihó bida, anto ta den tiramentu di atrako, ladronislanan brutal i tiramentu riba Polis.

Por ehèmpel den su racha di ladronisia ta resaltá ku na diferente kas i of direk-

shon den Witteweg el a pasa.

E kaya Witteweg ta komosifuera Cesar Cumare Villavicencio su sitio faborito pa hòrta, pasobra, ounke su hòrtamentunan tabata riba fechanan diferente, entre tantu ya el a pasa na e adrèsnan Witteweg 46, 47, 49 i ta manera e tin un kompromiso pa pasa hinter Witteweg, promé ku e sigui pa otro sitio.

Siendo Cesar Cumare Villavicencio tin 11 kaso ku e ta e protagonista (e ta e figura prinsipal), Corte a disidí di separá tratamentu di su kasonan i hinka nan den man di diferente Hues.

Caso nr. 2 te ku 8 lo keda tratá pa Hues señora mr. Paulides.

E otro kasonan ta den man di otro Hues i ta asina tambe ku ya el a keda sentensia pa su aktonan kastigabel kometé den Castorweg. Tin algun trámite ainda pa

tuma lugá promé ku e kasonan 2 te 8 keda tratá den sala di korte.

Por ehèmpel mester pone e partidonan perhudiká na altura di tratamentu di e kaso dia 1 di jüni benidero, ademas mester emití un dagfar ofisial na dje.

Enfin, Cesar Cumare Villavicencio por sinta algun dia mas den prizon di Koraal Specht, kome i yena su barika tur dia, pendiente di e fecha 1 di jüni 2018 pe presentá atrobe den Corte.

Ta nifiká ku e persona aki den realidat ta pèrdè su libertat temporalmente, pero e ta den un situashon muchu mas faborabel den prizon di Koraal Specht, kompará ku den prizon na Venezuela, pasobra aki na Kòrsou, apart di haña kuminda saludabel tur dia, tin trato médiko i sufisiente oportunidat di hasi rekreo, lesa buki, mira televishon, kana den kantina etcetera.

Hues a bolbe sentenciá adictonan na droga cu ta drenta sali sala di Corte

WILLEMSTAD - E dos cuidadanonan Rudly Quirindongo (42 aña di edat) i Renlon Pieter (35 aña edat), kendenan a pasa na numeroso ocasion kaba den man di hustisia pa nan adikshon na droga, su kaso a keda tratá siman pasa un biaha mas den sala di Corte.

E duo aki a sera kabes pa hòrta den un kas na Kanga. Tabata dia 28 di jüni 2017 cu nan a hòrta 4 bateria di outo, un radiator i algun piesa pa airco ku ta pèrtenesé na famia Janzen.

Promé ku Polis a gara ta Renlon Pieter, pero esaki a disidí di basha abou mesora riba su kómplise Rudly Quirindongo.

Pa suerte di e doño di kas i pa mala suerte di e duo aki, e kas den Kanga kaminda nan a hòrta, tabatin kámara instalá di manera ku debidamente por a mira ta ken ta esnan ku a drenta e kas aki. Remarkabel t'e hecho ku e akusado Renlon Pieter no tabata presente den sala di Corte, anto ta asina tambe ku Ministerio Públiko ya ta atendiendo un otro kaso kontra Renlon Pieter.

E tipo di adiktonan aki no sa para ketu, pasobra sin un akto kastigabel keda konkluí den sala di Corte ya e ta metí den e siguiente pa kua tambe lo e haña kastigu. E akusado Rudly Quirindongo

sí tabata presente pa duna kuenta i rason di su akto i ela a demostrá su mes dispuesto pa drenta Brasami pa someté su mes na trato kontra di su adikshon na droga.

Hues señora mr. Paulides a yega na un kondena di 360 dia kastigu di prizon di kua 274 dia kondishonal i un periodo di prueba di 2 aña, kitando e temporada ku el a pasa den aresto preventivo.

Ademas a yega na palabrashon ku Rudly Quirindongo pronto lo drenta Brasami. Pa Renlon Pieter, e kastigu a bini muchu mas pisá 12 luna di kastigu di prizon inkondishonal ta loke Hues a dikta den e sentensia.



Nan ta onbeskòp porko tambe.....

26½ Aña di kastigu pa quinteto atrakadó di Barber



WILLEMSTAD - E kaso di atrako ku arma di kandela na restorant Kibrahacha na Barber, kometé pa 5 suidada-
no dia 25 di mei 2017 a konosé su desenlase ku senten-
sianan pisá.

E akusadonan, kendenan tur sinku a ser haña kulpabel ta Sherton Isijk di 23 aña di edat, Meverick Stefania 21 aña di edat, Suviegelo Ersilia 23 aña di edat, Nicolay Polanco 22 aña di edat i Dudley Ersilia 40 di edat (tio di un di e atrakadónan, alabes e figura ku a duna instrukshon).

Un di e kondenadonan aki, despues di a skucha e senten-
cia ku Hues a dikta kontra di dje, den su rabia a disidí di skòp un di e Polisnan di parkèt.

E akto violento aki sin duda a kai hopi malu den bista di tur esnan presente, pasobra e ta demostrá un falta total di rèspèt pa outoridat i pa Corte di Hustisia en partikular.

Únikamente a surgi despues un interkambio di palabra entre e Polis di parkèt ku e detenido, miéntras e hòmber aki a sigui grita, bandonando sala, bisando ku e ta hopi rabiá.

Segun Hues tabata dikta sentensia a para ketu na e dos akusadonan Meverick Stefania i Dudley Ersilia, kendenan na último momento ainda a sigui nenga di tin algu di haber ku e atrako armá aki, siendo tin pruebanan kontundente kontra di nan.

Nicolay Polanco, Suviegelo Ersilia i Sherton Isijk si a rekonosé y/of aseptá nan kulpabilidad den e atrako arma ariba menshoná ku tabata na restorant chinas na Barber. Pa Hues e pruebanan ta stabil.

E deklarashonnan di e testigu Eisdén ta basá riba kredibilidad, Eisdén segun Hues a papia bèrdat. Sinembargo na e ponensia di Meverick Stefania ku ta pasobra Eisdén deb'é 500 florin el a disidí di inkriminá Meverick Stefania, hasiendo denunsia, Hues no a duna ningun tiki balor.

Hues a mostra ku e akusadonan no tabatin un akklarashon sufisiente pa e kòmbersashonnan telefòniko kompromet-
edó ku a keda analisá i ku ta duna tur indikashon ku ta relashoná ku e krímen aki.

E grupo aki a dreña serka e komersiante chinas di fam Li, apart di a hòrta su propiedat, den forma di e suma di 900 florin, mas karchinan di telefon, a batié ku skòp, maltrat'é i menas'é ku arma di kandela i pone kuchú na garganta, provokando un sentido di inseguridat ku ta bi-
rando e tendensia na nos isla.

E atrakadónan tabatin nan karanan tapá.

BISIÑA A SALI NA RESKATE

Mas aleu a bini padilanti ku no tabatin ningun kom-
pensashon den e kastigunan debí ku un bisiña a sali na defensa di e komersiante chinas tirando ku arma di kan-
dela dirigí riba un di e atrakadónan (Suviegelo Ersilia), kende a keda lastimá.

Ta den outo di un dje atrakadónan (Sherton Isijk) mes a hibé hospital. E bisiña tin pèrmit pa karga arma di kan-
dela!!!! E kastigunan di akuerdo ku e sentensia di wes señora Edelenbos a bira pa Sherton Isijk 5 aña kastigu di prizon; Meverick Stefania 5½ aña; Suviegelo Ersilia 5½ aña; Nicolay Polanco 5 aña y Dudley Ersilia 5½ aña.

E periodo ku nan a pasa den aresto preventivo lo keda deskontá i e arma di kandela i kuchú lo keda saká for di sirkulashon.



Konsiderando oumento di kriminalidat.....

Ekonomisando riba gastunan di Wardakosta lo tin efekto negativo

WILLEMSTAD - Den e reportahe ku Ministerio di Defensa Hulandes a traha riba funshonamentu di Wardakosta riba e funshon preventivo i represivo, e outornan a splika ku si ekonomisa riba gastunan di patruyahe ku avion i boto, esaki lo tin un efekto negativo riba e trabou di Wardakosta i RST.

E kondishonnan ta opvio: Tin asina tantu intento pa infiltrashon kriminal for di kosta di Sur Amerika prinsipalmente Venezuela, ku Wardakosta lo no por hasi su trabou efektivamente.

Esei a keda demostrá kaba ultimo lunanan.

E kategoria riba kual por ekonomisá mas tantu ta bahando e oranan di buelo di patruyahe i dje helikòpter di reskate.

Esaki lo afektá e velosidat pa aktua den kasonan di emergensia i prevenshon. I por lo tantu lo baha efektividat di tantu e mishonnan aereo i maritimo konsiderando e oumento di kriminalidat ku por spera lo bai tuma lugá. Kriminalidat den forma di trafikashon di droga, arma i trafiko humano.

BAHA SALARIO

Analizando di ki manera por baha gastu di operashon di Wardakosta na Aruba, Korsou, St. Maarten i Boneiru, ekspertonan a yega ne konklushon ku ta riba kondishonnan salarial i sekundario so por ekonomisa i baha gastu. No solamente e posibilidatnan pa baha gastu ta limitá of lo duna resultado a largo plaso sino ku lo tin di kibra akuerdonan laboral i kambia CAO.

Lòsmento di bala

WILLEMSTAD - Diabièrnè 2 di febrüari 2018, alrededor di 00.53 or, Central di Polis a ricibí notificacion di un caso di lòsmento di bala riba Sero Fortuna.

Mesora Central di Polis a dirigí un patruya n'e sitio. For di un investigacion cu Polis a realisá n'e sitio Polis a comprendé for di un testigo cu un hòmber a lòs algun tiro dirigí riba un dama (su ex) na momento cu e dama aki a yega cas den un auto.

Nuin di e balanan no a alcansá e dama, sinembargo e auto cu e dama tabata manehá si a haña perforacion di bala.

Despues di su acto e hòmber sospechoso aki a bay for di e sitio. Polis a confiscá e auto y un cantidad di "huls" n'e sitio pa mas investigacion. Ambulance a bin n'e sitio pa duna asistencia na un persona cu a bira malo despues di e suceso aki.

Alrededor di 08.12 or di mainta, Central di Polis a ricibí notificacion cu un hòmber sospechoso a pega un cas den área di Sero Fortuna na candela. E unidad policial cu a yega n'e sitio a topa cu un cas completamente na candela.

For di un investigacion preliminar cu Polis a haci n'e sitio a resultá cu probablemente dos hòmber sospechoso familiar di e dama ariba mencioná a pega e cas di e hòmber sopechoso cu den oranan di marduga a lòs bala riba su ex.

Polis a detené e hòmbernan: W.F.J. nacé na Còrsou di 45 aña di edad y U.S.A.J. nacé na Còrsou di 21 aña di edad. A presentá ambos sospechoso dilanti di un Fiscal auxiliar kende a ordená nan encarcelacion pendiente mas investigacion.

Caso “Emerald” ta bay Corte 6 y 7 febrüari awor na Sint Maarten



Cumana 76
Oranjestad, Aruba
Tel: 588-6699
Fax: 588-6698
Cel: 593-0857 / 560-1403

Señor ta mi Wardador, mi'n tin falta di nada;
den kunuku di yerba berde e ta pone mi sosega
E ta hiba mi na awa tranquil;
pa mi bolbe haña forsa

Cu inmenso tristeza na nos curazon,
pero conforme cu boluntad di Dios nos ta
participa fayecimiento di:



Sra. Rina Felipa Engelhart-Henriquez

Mihor conoci Rina
*26-05-1937 - †31-01-2018
Viuda di †Edgar M. (Getty) Engelhart

Na nomber di su:

Yiunan: Ruth M. Norbert
Ruben Engelhart
Mauricio A. Engelhart
Rhoda (Roosje) Engelhart-Kelly
Sergia Engelhart

Mescos cu yiu: Maiquito Ruiz
Rumannan: †Nico Henriquez y fam.
†Carmen Croes y fam.
Lichi Semerel y fam.
Lorenzo Henriquez y fam.
†Tula Henriquez y fam.
Chido Henriquez y fam.
†Juan Henriquez y fam.
Ivar y rumannan y fam.
†Mitsia Barranco y fam.
Cuñanan: Adriaan E. Engelhart y fam.
†Otmar Engelhart y fam.
Imelda Polsbroek y fam.
Olga Muller y fam.
Gladys Craanberg y fam.
Stanley Engelhart y fam.
Richard Engelhart y fam.
Gerda Braaf y fam.
Henk Braaf y fam.

Mescos cu ruman: Filothea Peterson-Ruiz
Frida Thielman-Ruiz
Aida Solognier-Ruiz
Donald Ruiz
Lester Ruiz
Peggy Arindell-Ruiz
Flossy Ruiz
Catherine Jacobs
Mariela Ridderstap
Fam. Schoop

Demas famia: Henriquez, Werleman, Varis, Wernet,
Maduro, Rasmijn, Kock, Koolman, Ras, Croes,
Semerel, Bexkens, Mendez, Gomez, Ruiz, Barranco,
Schoop, Braaf

Nos disculpa si encaso nos a lubida algún famia of
conocer.

Ta invita pa asisti na acto di entierro cu lo tuma
lugar diamars 6 Februari 2018 for di 9'or pa 11'or di
mainta na Aurora Funeral Homes, despues lo sigi
pa santana Central Sabana Basora

PHILIPSBURG - Corte Promé Instancia na Sint Maarten ta bay trata 6 y 7 di febrüari 2018 caso “Emerald”. Ta trata di un caso contra doño di 7 empresa kende ta ser sospecha di evadí impuesto di entrada di benta.

E sospechonan a resultá durante investigacion “Emerald”, un investigacion di TBO

(Team Bestrijding Ondernijning) relacioná cu posibel fraude y corrupcion den haf di Sint Maarten.

A bin sali na cla cu empresanan cu ta ser sospecha, a paga (específicamente) den añan 2012-2016 alrededor di 8 mion dolar pa trabounan den haf. Di e trabounan aki e empresanan no a haci mencion na Servicio di Belasting, esey ta castigabel.

Di acuerdo cu calculacion di Servicio di Belasting, pais Sint Maarten a pèrdè mas cu 6 mion florin (Antiano) na entrada di Belasting.



Cumana 76
Oranjestad, Aruba
Tel: 588-6699
Fax: 588-6698
Cel: 593-0857 / 560-1403

“Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa tranquil,
Pa mi bolbe haña forsa”.
Salmo: 23

Cu hopi tristesa y dolor nos ta participa fayecimiento cristianamente di:



Angelica Gonzalez-Arendsz

*18-10-1939 - †01-02-2018

Na nomber di su:

Casa: †Jesus M. Gonzalez
Yiunan: †Lucia Gonzalez
Magaly Gonzalez
Joselito y Edwina Gonzalez-Vrolijk
Omaira y Eric Filé-Gonzalez
Ruben y Charissa Gonzalez-Varis

Nietonan cria manera yiu:
Maikel Tromp
Edwin Tromp y Nikita Croes

Nieto(a)nan: Kelvin Sylvania y Francisca
Maduro, Cindy Sylvania, Maryleen Tromp, Michel-
Angelo Tromp, Keyshawn Filé, Darshawn Filé,
T'Shawnee Filé, Ruson Gonzalez, Silviene Gonzalez

Bisanietonan: Jahyron, Claryleen, Edmar,
Edjah, Nixianne

Rumannan:
Theresita y Johann Boekhoudt-Arendsz y famia
Sabina y Simon van der Linden-Arendsz y famia

Su iha: Benhard Franken

Su ayudante: Titi Rodriguez-del Pino

Subrino y subrinanan, primo y primanan, tur bisiña
y conocirnan

Demas famia: Arendsz, Gonzalez, Boekhoudt, van
der Linden, Filé, Varis, Vrolijk, Tromp, Sylvania,
Wolter, Marin, Loefstop, Rodriguez, Del Pino,
Quijada

Despensa nos cu den nos tristeza nos por a lubida
algún famia.

Condolencia lo tuma lugar diamars 6 di februari
2018 na Paradera # 91-A di 7'or pa 9'or di anochi.

Entierro lo tuma lugar diaranzon 7 di februari 2018
di 9'or pa 11'or di mainta na Aurora Funeral Home,
después saliendo pa Santana catolico Pastoor
Kranwinkel na Paradera.



Cumana #44 Tel: 586-4444 / 733-2906
E: royalfuneralhome@hotmail.com / 593-0857 / 731-5847

Laga tur locual cu ta sperami ta bunita.
Laga tur locual cu mi encontra na caminda ta
bunita.
Laga tur locual mi laga atras keda bunita y
Laga esakinan termina den tur bunita
Cado Weber

Cu inmenso tristeza pero conforme cu boluntad di
Dios nos ta anuncia fayecimiento di:



Betty Solagnier

*07-08-1941 - †02-02-2018

Na nomber di su rumannan:

Ray – Tina Solagnier-Ras
Vda. Carmen Solagnier-Maduro
Flip – Cecilia Solagnier-Duarte
Candy Solagnier

Sobrino y Sobrinanan y nan famia:

Mirjam – Karl
Leny – Peter
Hubert – Paola
Jos – Magaly
Rene – Mary
Marcel – Joanne
Dotty
Alex – Mylene
Antoine – Anastacia
Jeanine
Audric – Yvette
Randinka – Ronald
Charlize – Elvis

Ex Collega y fiel amiga: Martha Falconi.
Su ayudante: Lola Geerman.

Ta invita pa asisti na e acto di entierro cu lo tuma
lugar Diaranson 7 di Februari 2018 for di 9or pa
12or di merdia na Royal Funeral Home. Responso
lo ta 11or y mei, pa despues sali pa Santana
Catolico Santa Maria na St.Cruz.

Despues di entierro no lo ricibi bishita di condolen-
cia na cas.



Cumana 76
Oranjestad, Aruba
Tel: 588-6699
Fax: 588-6698
Cel : 593-0857 / 560-1403

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur buniteza.
Cado Wever.

Cu inmenso tristeza na nos curazon, pero conforme cu boluntad di Dios nos ta participa fayecimento di :



Hermenegilda Praxecedes Croes-Donata

Mihor conoci como "Hilda"
* 13 april 1942 - † 3 februari 2018

Acto di entierro lo wordo anuncia despues.



Cumana 76
Oranjestad, Aruba
Tel: 588-6699
Fax: 588-6698
Cel : 593-0857 / 560-1403

"Bou di alanan di Dios mi ta sigur"
Abo ku ta biba bou di amparo di Altisimo,
ta hospeda den sombra di Dios Omnipotente,
bisa Señor:

"Mi refugio, mi forti, mi Dios,
den kende mi ta pone mi konfiansa"
Salmo 91:1-2

Cu inmenso tristeza na nos curazon,
pero conforme cu boluntad di Dios nos ta participa fayecimento di:



Irma Lacle

Mihor conoci como "Lerma"
*17-02-1932 – †28-01-2018

Na nomber di su

Yui: †Humphrey Kelly

Rumanan:

†Thomasa
†Jan y sra y famia
†Nico y sra y famia

Sobrino(a)nan:

Carin
†Marlon y Lillian y famia
†Janine y famia
Marlin y Dinand y famia
Rino y Flor y famia
Juni y Angela y famia

Tur e primanan y primonan, bisinanan y conocirnan di Saba, su zusternan y compańeronan.

Demas famia : Lacle, Croes, Olive, Bremono, Dirks, Thiel, Loefstop, Maduro

Ta invita pa asisit na e acto di entierro y cremashon lo tuma lo tuma lugar diamars 6 februari 2018 for di 9'or pa 11'or na misa Santa Filomena na Paradera, despues lo wordo crema den seno familiar.



Cumana 76
Oranjestad, Aruba
Tel: 588-6699
Fax: 588-6698
Cel : 593-0857 / 560-1403

Nos ta anuncia fayecimento di:



Cornelio Camilio Engelhardt

Mihor conoci como "Bubu Carpinte"
16-09-1925 – 17-01-2018

Na nomber di su:

Yiunan: Robinson Engelhardt
Carena y Raymond de Windt Engelhardt
Melencia Engelhardt
Nilva Engelhardt
Yvonne da Silva de Freitas Engelhardt

Ruman: Gloria Tromp

Nieta(o)nan: Philip Cratsz

Itel Martis

Flaviana, Renata, Mark de Windt

Nishette y Eleazar Blindenburg

Rose-Morella, Giçon, Givan Francisca

Isabel, Mariana, Carolina da Silva de Freitas

Tur subrinonan y famia

Subrino stima : Ciro Schoop

Amigunan: Freddy Paula

Chimbo Jacobs

Casimiro Mejilla

Cesar Asmat

Bisinanan: Janive y Victor Alfonso y demás bisinanan

Organisashon di Testigo di Jehova

Demas famia: Engelhardt, Larez, Tromp, Schoop,

Geerman, Krozendijk, Hart, Nuboer, Christiaan,

Braaf, Baranco, Neponuccinho,

Curaçao : La Cruz, Alee Navaro, Francisca, De

Windt, Blindenburg, Martis,

Bonaire: Felix

Acto di despedida y entierro lo tuma lugar dialuna 5 di februari 2018 na Salon di Reino na Bubali # 5-F di 1'or pa 2:30pm. Discurso ta cuminsa 1:30pm. Despues lo sali pa Santana Central Sabana Basora


Disculpa nos pero despues di entierro nos no ta ricibi bishita di condolencia na cas.



Cumana 76
Oranjestad, Aruba
Tel: 588-6699
Fax: 588-6698
Cel : 593-0857 / 560-1403

Gradicimento / Invitacion

Pa medio di esaki famia kier a gradici tur esnan cu di un manera of otro a muestra nan atencion y a duna nos sosten durante fayecimento y despedida di nos difunto stima::



Maria Isabel Krosendijk-Bikker "Nene"

Boso presencia tawata altamente aprecia danki for di profundo di nos curazon

Alaves nos ta invita boso pa compaña nos na 3 Santo sacrificio di Misa cu lo tuma lugar
Diabierna 9 di februari 2018 pa 7'or di anochi
Diasabra 10 di februari 2018 pa 7'or di anochi
Domingo 11 di februari 2018 pa 9'or di mainta na Misa Inmaculada Concepcion na Sta Cruz.

Boso presencia lo ta altamente aprecia



Openbare Avondleergangen Aruba Beroepsonderwijs

Cu profundo tristeza staf y personal di Openbare Avondleergangen Aruba ta anuncia fayecimento inespera di

Sr. Eric H. Hunt

Ex colega y amigo di nos.

Hopi forza ta bay na su casa, yiunan y demas familianan den e dianan dificil aki.

Israel ta cuminsa proceso pa deporta miles di ciudadano Africano



Cumana 76
Oranjestad, Aruba
Tel: 588-6699
Fax: 588-6698
Cel : 593-0857 / 560-1403

Cu inmenso tristesa na nos curason pero conforme cu Dios su boluntad, nos ta anuncia fayecimento di:



Marlon Valentino Werleman

* 7 April 1953 – † 1 Februari 2018

Na number di su:

Mayornan:

†Cornelia Werleman y †Bernardo Arends

Esposa stima: Maria Christina Werleman - van Alen

Su yiunan: Roxana Vrolijk

Ranzinho Werleman

Rumannan:

- Rulfia y Ronny Kock y famia
- †Iraida Werleman y Eddy Stamper
- Jacqueline y Michael Lo-Fo-Sang y famia
- Jorge Werleman y Jacky Colina y famia
- Elvis Werleman y Maria Irausquin y famia
- Henry Werleman y famia
- Gioconda y Frank Droog- Werleman y famia

Sobrino y sobrinanan y famia:

Malina, Charlyne, Bianca, Jonathan, Kristi-Lynn
Gino, Melisa, Jessica, Jelitz, Joël, Jayden,
Michelyne y Jairzinho

Mama di su yiunan: Amanda Vrolijk

Swa y Cuñanan:

Franklin Jacapuchi
Maria Jacapuchi
Glenda Mercedes van Alen y yiunan
Astrid Jacapuchi y yiunan

†Richenell Pieterella

Sharma Pieterella y Richard v.d. Berg y yiunan
Xiomara Pieterella y Randy Alego y yiunan

Amigonan di cas:

Tony y Ingrid Celaire, Mike y Doina Eman,
Benny Sievinger, Melvin
Tromp, Eddy Stamper

Su ayudantenan :

Julissa Arends y Roy Tromp

Tur esnan trahando na Insam afdeling Dialyse

Y tur, primo y primanan, tanta y omonan, comer y compernan y demas famia Werleman, Stamper, Kock, Lo-Fo-Sang, Colina, Everon, Irausquin, Geerman, Droog, Teuben, Koolman, Vrolijk, Cornelio, Henriquez, Maduro, Albertsz, Wernet, Wever, Thijzen, van der Linden, Ras, de Cuba, Arends, Lee, Leon, Martines, Croes y Matevosyan ta invita tur amigo, bisiña, conocirnan, pa asisti na e acto di entierro, cual lo tuma lugar Diamranson 7 di Februari 2018 di 2 or pa 4 or di atardi na Misa Sagrado Curason na Savaneta, pa despues sali pa Santana Catolico na Savaneta. Nos difunto stima lo reposa for di 2 or di atardi na misa,

Nos disculpa si den nos tristesa a lubida un of mas famia y conocirnan.

Nos ta lamenta cu despues di entierro nos no por ricibi bishita di condolencia na cas.

GOBIERNO di Israel a cuminsa ayera cu e proceso di entregamento di carta na inmigrantenan di Sudan y Eritrea, cu ta residente na Israel, pidiendo nan pa bandona e pais den un margen di 60 dia cu un apoyo financiero di 3500 dollar, y e pago di un ticket di avion di avion, segun informacion publica pa medionan local.

Esaki ta e prome paso di e plan nobo aproba na januari dor di e Gobierno local, cual lo afecta entre 35 mil y 40 mil inmigrante. Esaki ta establece cu e mayoria lo tin di bandona e pais of wordo encarcela pa tempo indefini, cuminsando na april proximo.

Na prome instante ta haci entrega di dicho cartanan na aproximadamente 20

mil homber proveniente di Sudan y Eritrea, sin yiu na nan cargo.

E gran mayoria di inmigrantenan Africano a drenta e pais clandestinamente via e frontera Egipcio di Sinai, prome cu e Gobierno di Israel a construi un muraya cu awendia ta separa ambos territorio.

Segun e NGO Hotline pa Refugiado y Migrante, mas o menos 12 mil a solicita refugio na momento cu nan a yega e pais (cifra cu ta data for di 2013, aña cu a permiti pa hasi esaki), pero 7 mil solicitud a wordo nenga, solamente 11 a keda aproba y e resto ainda ta den proceso. Actualmente tin como 37 mil Eritreo y Sudanes cu recidi na Israel, segun data di Reu Mijaeli, kende ta Director di e NGO Hotline pa Refugiado y Migrante, cu ta splica cu “pa awor, e famianan, esnan vulnerabel, menornan di edad y hende grandi ta exclui for di e plan, pero esaki lo por cambia den futuro”.

E politica nobo di e Gobierno di Israel riba e inmigrantenan Africano, a keda condena publicamente pa representantenan halto di diferente religion na e pais, escritornan, academiconan, dokternan y sobrebibientenan di e holocaust, kendenan a manda carta na e respectivo autoridadnan na Israel, solicitando e anulacion di dicho plan. Pilotonan di avion tambe a señala lo bay nenga di bula e avionnan unda cu e deportadonan lo mester wordo transporta.

Diabierna ultimo, un grupo di academiconan specilisa den derechonan internacional, a señala den un comunicado cu e plan di e Gobierno ta viola leynan internacional di derechonan humano, e jurisprudencia internacional riba e status di e refugiado, y e principio di no devolucion, y nan a haci un yamada na Fiscalia pa opone na dicho plan.



Cumana 76
Oranjestad, Aruba
Tel: 588-6699
Fax: 588-6698
Cel : 593-0857 / 560-1403

Gradicimento y Invitacion

Quizas bo a manda un carchi, of a pensa riba nos.
Quizas ba manda un kran, un mensahe of WhatsApp.

Quizas bo a consola nos, cu palabranan yena di Amor, Quizas bo'n por a llega, pa por a brasa nos.
Nos ta gradicibo pa e consolacion, cual lo keda semper, graba den nos curazon.

Pa medio di esaki, famia Lampe y Saladin kier a gradici tur esnan cu na un manera of otro a duna nos sosten, consuelo y forsa durante e dianan dificil cu e fayecimento repentino y entierro di nos querida



Altagracia Lampe-Saladin

"Elsa"

E muestra inmensamente grandi di Atencion, Cariño y Amor cu nos a ricibi for di cada un di boso ta un gran consuelo pa nos. No tin palabra pa gradici cada un di boso pa cu esaki.
Nos ta invita famia, bisinja, amigo y conocirnan pa compana nos na 3 Santo Sacrificio di Misa;


Diamars, February 6, 2018, na Alto Vista pa 5.30pm

Diaranzon, February 7, 2018, na Misa Santa Ana na Noord pa 6.30pm

Diasabra, February 10, 2018, Misa Santa Filomena na Paradera pa 7.00pm



Tiroteo pa odio racial a causa basta herida na 6 stranhero na Italia



Seis persona di origen africano a resulta herida diasabra dor di disparonan propina pa un hoben cu vinculonon ultraderechista na Macerata (centro di Italia), un acto motiva pa odio racial, segun autoridadnan a duna di conoce.

E homber cu a los tiro for di su auto a wordo aresta y e no a musta di kier a oponer resistencia.

“Tin seis herido y tur ta stranhero”, tabata declaracionnan hasi pa e alcalde di e localidad, Romano Carancini, despues cu e tiroteo a keda registra diasabra mainta, cual a causa panico den e ciudad di 43 mil habitante.

E seis heridonan ta procedente di Mali, Ghana y Nigeria, segun e agencia di prensa Agi.

E sospechoso identifica dor di prensa como Luca Traini, di 28 aña, tabata wordo interroga pa polis oranan despues di e sucedido.

E tabata un acto evidente di odio racial, segun Minister Italiano di Interior, Marco Minniti, declaracion haci despues di un reunion cu el a sostene cu departamento Policial local.

E atake ta product di un “cultura di extremismo derechista cu referencianan fuerte na fascismo y nazismo”, e Minister a sigui bisa, kende a pone enfasis riba e hecho cu e unico vinculo entre e victimanan tabata e color di nan cuero.

Despues cu e homber a para su auto, Alfa Romeo preto, dilanti di e monumento, e tabatin tempo suficiente pa kita su jacket, bisti un bandera Italiano rond di su nek, haci e saludo fascista y grita “Viva Italia!”, segun informacionnan cu prensa Italiano a haya for di testigonan.

Polis a haya e arma di candela cu e agresor a uza, den su auto, cu segun medionan di comunicacion, el a reconoce e hechonan.





Iran a detene 29 muhe cu a kita nan velo den protesta



POLIS di Iran a detene 29 muhe cu a kita nan velo islamico, obligatorio na e pais, den señal di protesta. E agencia priva di noticia Tasnim, alia na Gobierno, a afirma cu esnan deteni tabata participa den un campaña contra hiyib obligatorio conoci como “Diaranson Blanco”.

Bou di e campaña defendi door di e rednan di television satelital den idioma farsi cu sede den e stranheria, e participantenan mester kita nan velo blanco diaranson. E agencia no a duna mas detaye riba e momento y luga di e detencionnan.

Den e ultimo dianan publicacionnan den e rednan social a mostra cu varios hende muhe protestando contra e uzo obligatorio di e velo islamico, kitando esaki y colgando esaki den palonan of luganan publico na Teheran y otro ciudadnan. E muhenan cu muestra nan cabeynan den publico ta wordo hiba prizon te cu 12 luna of ta haya boet.

Presidente di PAWA Dominicana deteni na aeropuerto di Punta Cana ora e tabata purba di sali for di e pais



E Presidente di e linea aereo suspendi PAWA Dominicana, e Mericano Gary Stone, a keda deteni repentinamente diasabra atardi dor di autoridadnan di e Direccion General di Migracion na Aeropuerto Internacional di Punta Cana, ora cu e tabata cla pa subi un avion cu destinacion Miami, Florida.

Segun detayenan obteni for di un fuente di migracion, ta existi un prohibicion contra sr. Stone cu ta impedi p’e sali for di Republica Dominicana. Tal prohibicion a wordo interponi dor di autoridadnan di Aviacion Civil di e pais, pa motibo di e situacion economico dificil cu PAWA Dominicana ta pasando aden actualmente.

E Hunta di Aviacion Civil (JAC), si man pasa a suspende e operacionnan di PAWA Dominicana pa 90 dia, despues cu nan debe di pagonan di servicionan aeronautico a acumula na e suma di 7 milyon dollar.

Segun informacion cu ta circula, e Presidente Ehecutivo di PAWA, tabata a punto di subi un avion cu destino na e ciudad di Miami, na Merca.

Supuestamente e biahe di Stone tabata tin como finalidad pa reuni cu e propietario di PAWA Dominica, sr. Simeon Garcia.

Ta wordo bisa cu e ehecutivo di PAWA Dominicana ta reteni actualmente n’e oficina di e Direccion General di Migracion di Aeropuerto di Punta Cana, caminda e ta wordo interroga pa autoridadnan concerni.

Despues e lo wordo translada pa e ciudad capital di Santo Domingo.

Sr. Gary Stone ta ocupa e cargo di Presidente Ehecutivo di PAWA Dominicana, for di luna di mei 2017 ora cu el e keda nombra pa e Direccion General di e compania na Republica Dominicana.



AWEMainta

#1 Online

Completamente
DIGITAL

**Ricibi AWEMainta
tur dia den bo inbox**

Manda bo E-mail na noticia@awemainta.com

**Haya noticia y edicionan di
AWEMainta riba nos website**

www.awemainta.com

Like nos riba Facebook

www.facebook.com/awemainta